


# INFO



CENTAR ZA KULTURU,  
SPORT I INFORMISANJE

BUŽIM

Info-bilten općine Bužim | Broj: 6 | januar-decembar, 2019. | [www.ckbuzim.ba](http://www.ckbuzim.ba)



STARI GRAD BUŽIM  
KONAČNO DOBIO RASVJETU

PREDSTAVLJEN IDEJNI PROJEKAT  
TRGA ALIJE IZETBEGOVIĆA

BUŽIMLJANIN EDIN VUČELJ  
OSVOJIO ZLATO NA SVJETSKOM PRVENSTVU  
U KICKBOXINGU U TURSKOJ



## UVOD

Poštovani čitaoci,

Ovaj Informativni bilten je namijenjen Vama dragi građani Općine Bužim, bilo da ste u domovini ili dijaspori, te svima ostalima koji žele pratiti rad načelnika Općine Bužim i sve ono što se događa u Vašoj Općini.

Moj kabinet je uvijek otvoren za vaša pitanja, ideje, prijedloge i sugestije. Naša misija i zadaća je da Općinska uprava mora biti servis građanima. U ovom biltenu možete naći najznačajnije informacije koje su obilježile 2019.godinu, te ostale korisne informacije od značaja za sve građane i posjetioce Općine Bužim.

Iskreno se nadam da će ovaj bilten poslužiti kao sredstvo dvosmjerne komunikacije načelnika Općine Bužim i njenih građana, kao i sredstvo promocije naše lokalne zajednice. Uz vašu podršku i učestvovanje znam da ćemo stvoriti bolju, ljepšu i prosperitetniju Općinu Bužim.

Ukoliko imate prijedlog, kritiku ili interesantnu informaciju, pošaljite ih putem e-maila na adresu [nacelnik@opcinabuzim.ba](mailto:nacelnik@opcinabuzim.ba) ili putem faksa na broj +387 37 410 031.

Vaš načelnik Mersudin Nanić

# SADRŽAJ



CENTAR ZA KULTURU,  
SPORT I INFORMISANJE  
BUŽIM

<b>KABINET NAČELNIKA</b>	<b>2</b>
<b>INFRASTRUKTURA</b>	<b>13</b>
<b>KULTURA</b>	<b>20</b>
<b>PRIVREDA-POLJOPRIVREDA</b>	<b>27</b>
<b>SPORT</b>	<b>33</b>
<b>OBILJEŽAVANJA</b>	<b>42</b>

IZDAVAČ:

JU "Centar za kulturu, sport i infomrisanje"

505. Viteške brigade bb / 77245 Bužim

Tel / fax: +387 37 410 332

E-mail: [jucksi@hotmail.com](mailto:jucksi@hotmail.com)

[jucksi.buzim@bih.net.ba](mailto:jucksi.buzim@bih.net.ba)

[www.ckbuzim.ba](http://www.ckbuzim.ba)

## NAČELNIK OPĆINE BUŽIM MERSUDIN NANIĆ ZVANIČNO PREUZEAO DUŽNOST



Nakon što je Centralna izborna komisija Bosne i Hercegovine potvrdila izborne rezultate na vanrednim lokalnim izborima u Općini Bužim, novoizabrani načelnik Mersudin Nanić, kandidat SDA, je 20. marta 2019. godine zvanično preuzeo dužnost od dosadašnjeg v.d. načelnika Nedžada Kudelića.

U sedmičnim redovnim aktivnostima općinskog načelnika i šefova općinskih službi, predviđeni su radni sastanci sa predstavnicima MZ, direktorima privrednih subjekata, direktorima javnih ustanova i javnih preduzeća, predstavnicima političkih partija i OV, a svakako su planirani i sedmični sastanci sa NVO sektorom, boračkim udruženjima, sportskim kolektivima, kulturnim radnicima i mladima.

“Očekujem maksimalno zalaganje i konkretne rezultate svih uposlenika organa uprave, jer se samo zajedničkim radom može puno toga uraditi za naše sugrađane. Uvjeren sam da ću u periodu koji dolazi opravdati ukazano povjerenje građana. Sagledao sam stanje u svim općinskim službama u kojima će se morati mnogo raditi na poboljšanju i unaprijeđenju trenutnog stanja”, kazao je Nanić.

Mersudin Nanić došao je sa jasnim ciljem, a to je da realizira što više projekata koji su u interesu građana ove lokalne zajednice i da organ uprave bude u službi svih njenih građana. On je istakao da će bit načelnik za sve građane, da im stoji na raspolaganju, te da zajednički želi raditi na poboljšanju uslova života u svim dijelovima općine.

“Nezaposlenost, infrastruktura, odlazak mladih ljudi i nedovoljno razvijena privreda samo su neki od velikih problema koji su nam ostavljeni u amanet, a koji su u samom vrhu naših prioriteta. Svakako da će nam za njihovo rješavanje biti potrebna podrška građana i svih ljudi koji žele dobro ovoj lokalnoj zajednici“- istakao je Mersudin Nanić, načelnik Općine Bužim, povodom preuzimanja dužnosti općinskog načelnika.

## NAČELNIK NANIĆ POLOŽIO SVEČANU ZAKLETVU



**N**ovoizabrani načelnik Općine Bužim Mersudin Nanić položio je svečanu zakletvu na sjednici Općinskog vijeća koja je održana 28.marta 2019. godine. U narednom periodu treba nam jedan dobar rad, kako lokalne uprave tako i lokalne politike koja se reflektuje kroz Općinsko vijeće. Očekujem puno dobrih rezultata, te vašu aktivnost i podršku za doprinos svim projektima koji će unaprijediti život na području Općine Bužim, posebno u infrastrukturnom i ekonomskom smislu“- poručio je nakon sjednice OV Bužim načelnik Mersudin Nanić.

## PROJEKAT „JA GRAĐANIN“ DOBIO PODRŠKU NAČELNIKA OPĆINE



**U**čenci Osnovne škole Bužim koji rade na projektu „Ja građanin“, u sklopu predmeta Demokratija i ljudska prava, a koje sprovodi Civitas posjetili su Općinu Bužim i Općinskog načelnika. Učenicima je bio najinteresantniji projekat problem pasa lualica jer se u školskom dvorištu susreću s tim problemom svakodnevno . Nakon izabrane teme učenici su otpočeli sa izradom portofolia na kojem će predstaviti problem na takmičenju koje se održava u Bihaću 02.04.2019. Učenici su identificirali izvore informacija i pomoći za svoj problem. „Općina Bužim i ja kao Općinski načelnik podržavam svaku ideju, inicijativu, projekat koji dođe od mladih ljudi, pogotovo ako se radi o učenicima osnovnih i srednjih škola,

te vam ovom prilikom želim uputiti iskrene čestitke na ovakvoj ideji i da na najbolji način predstavite našu školu na predstojećem takmičenju “- istakao je načelnik Nanić. Na kraju je Općinski načelnik uručio majice koje će naši učenici nositi na ovom takmičenju.

## NAČELNIK OPĆINE BUŽIM MERSUDIN NANIĆ U POSJETI DIJASPORI



**N**ačelnik Općine Bužim, Mersudin Nanić, svoje prve zvanične posjete nakon preuzimanju mandata Općinskog načelnika, ima van granica naše domovine i to u Sloveniji i Austriji. Prva službena posjeta je gradu Ljubljani gdje se susreo sa Slovenačkim muftijom Nedžadom Grabusom i sugrađanima iz Bužima, koji se nalaze na privremenom radu u R Sloveniji. Prilikom susreta razgovarano je o budućim projektima koji se tiču Općine Bužim, te je izražena velika spremnost sa obe strane da se u što skorije vrijeme i pokrenu određeni projekti koji će ojačati saradnju i biti od koristi građanima i lokalnoj zajednici. U sklopu posjete delegacija je posjetila Islamski centar u Ljubljani, te se nakon toga uputila na drugu službenu posjetu na centralnu manifestaciju „Večer Kur’ana 2019“ koja se organizira u povodu obilježavanja IX godišnjice Bosansko-Islamskog kulturnog centra „Bošnjak“ u Grazu.

U kabinetu Općinskog načelnika potpisan je Ugovor o upravljanju i korištenju, održavanju i upotrebi objekta „Sportska dvorana Bužim“. Ugovor su potpisali načelnik Općine Bužim Mersudin Nanić i v.d. direktor JU „Centar za kulturu, sport i informisanje“ Bužim Vahidin Veladžić. Potpisivanjem ovog ugovora stvoreni su preduvjeti za bolje funkcionisanje Sportske dvorane Bužim. Naime, kao što je poznato dvorana već nekoliko mjeseci funkcioniše na način da se o njoj brine Sportski savez Općine Bužim, ali u formalno pravnom smislu riječi ona nije „otvorena“ i niko nije odgovoran za nastanak bilo kakve štete na objektu ili opremi. MSS „Hasan Musić“ Bužim takođe koristi dvoranu, ali za te namjene nije imala s kim potpisati ugovor kojim se definišu prava i obaveze.

## ODRŽAN SASTANAK SA PRIVREDNICIMA OPĆINE BUŽIM



U sali Općine Bužim prvi zvanični sastanak Općinskog načelnika Mersudina Nanića održan je sa privrednicima Općine Bužim. Sastanak je iniciran upravo od strane načelnika, a tema sastanka bila je otvorena diskusija i problemi sa kojima se susreću privrednici na području naše Općine. Između ostalog bilo je govora o odluci o utvrđivanju radnog vremena na području naše Općine, a razgovaralo se i o druženju privrednika i dijaspore. Posebno se razgovaralo o radu i aktivnostima udruženja privrednika kao subjektu od kojeg svi privrednici očekuju veću angažiranost u zastupanju interesa važnih za sve njihove projekte. Bilo je govora

o medijskim informacijama o mogućem smještaju za migrante u Bužimu. U uvodnom dijelu sastanka, Općinski načelnik je pozdravio prisutne i poželio im puno sreće i uspjeha na ličnom i profesionalnom planu u narednom periodu, te istakao da Općina Bužim kao organ uprave uvijek stoji na raspolaganju u smislu rješavanja administrativnih procedura za sve ono što je u nadležnosti Općine. Privrednici su pozdravili ovakav potez Općinskog načelnika s nadom da će u budućnosti biti mnogo ovakvih susreta. Zajednički prijedlozi i zaključci sastanka su: 1. Privrednici su saglasni da treba organizirati veće privrednika sa dijasporom, 2. Aktivirati udruženje privrednika kako bi lakše mogli komunicirati sa organom uprave i pratiti sve propise i zakone koji se tiču privrednika.

Na sastanku je naglašeno da Bužim nema kapaciteta za otvaranje bilo kakvog migracionog centra, jer zasad nema dovoljno kapaciteta ni za naše potrebe. Kada je u pitanju odluka o radnom vremenu svi su stava da je manjkava i da je treba doraditi, te će privrednici u narednim danima dostaviti svoje prijedloge kako bi se odluka doradila na zadovoljstvo svih. „Želio sam da prvi zvanični sastanak bude sa našim privrednicima, jer oni najvećim dijelom pune budžet, ušestvuju u kontinuiranoj izgradnji i razvoju naše Općine i upošljavaju veliki broj naših sugrađana. Ono što je do nas uradit ćemo sve za naše privrednike. Pripremit ćemo izmjenu i dopunu odluke o radnom vremenu i proslijediti je Općinskom vijeću na usvajanje“ - kazao je načelnik Mersudin Nanić.

## VOLONTERI ZAVRŠILI VOLONTERSKI RAD U OPĆINI BUŽIM



Načelnik Općine Bužim Mersudin Nanić sa šeficom Službe za opću upravu i društvene djelatnosti Elvirom Muratović održao je sastanak sa volonterima koji su završili svoj volonterski rad u trajanju od jedne godine. Svim volonterima su dodeljena uvjerenja o obavljenom volonterskom stažu u organu uprave, a preporuke o izvršno obavljenom volonterskom stažu dobili su pojedini volonteri.

„Iako nisam pratio vaš cjelogodišnji rad za ovo kratko vrijeme mogu biti zadovoljan sa onim što sam vidio ali i čuo od vaših mentora. Želim Vam svima puno zdravlja i sreće u budućnosti sa uvjerenjem da će neko od vas

imati priliku dobiti posao. Uvjeren sam da ste bogatiji za jedno iskustvo i da ste za ovih godinu dana stekli nova znanja koja će vam sigurno koristiti u budućnosti“ - istakao je načelnik općine Bužim Mersudin Nanić.

## NAČELNIK OPĆINE NOVI GRAD SARAJEVO U POSJETI OPĆINI BUŽIM

Općinski načelnik Mersudin Nanić sa saradnicima ugostio je delegaciju Općine Novi Grad Sarajevo sa načelnikom Semirom Efendićem i savjetnikom načelnika Nezirom Hadžićem. Ovo je inače prva zvanična posjeta načelnika najmnogoljudnije Općine u BiH. Načelnik Nanić je kolegu iz Novog Grada Sarajevo upoznao sa trenutnim političkim prilikama u općini Bužim, stanju u privredi, te o započetim projektima kao i o onima koje je potrebno realizirati. Osim toga, razgovaralo se i o razvojnim mogućnostima općine Bužim, a prezentirani su i potencijali sa kojima raspolaže općina Bužim kako bi se pronašlo nabolje rješenje za buduću saradnju.



„Općina Novi Grad Sarajevo je najmnogoljudnija, a općina Bužim sa najmlađom populacijom u BiH. Bužim je imao Izeta Nanića, a Općina Novi Grad Safeta Hadžića i Safeta Zajku pa je i to dovoljan razlog za saradnju. Pored toga građani Bužima su na posljednjim izborima povjerenje ukazali mladom kandidatu, slično kao što je bio slučaj i u općini Novi Grad 2012. godine. Sa zadovoljstvom ću podijeliti svoja iskustva sa kolegom iz Bužima i nadam se da će mu ona biti od koristi. Našoj državi trebaju mladi ljudi puni energije naročito na lokalnom nivou gdje su brojni problemi koje treba rješavati i projekti koje treba realizirati, kako bi država došla na nivo razvoja koji će biti zadovoljavajući za ljude koji u njoj žive. Ovo su herojske sredine koje su znale kada je bilo najteže našu državu braniti, pa je tako isto i u miru trebaju graditi“, kazao je načelnik općine Novi Grad Semir Efendić

Nakon zvaničnog sastanka načelnici su posjetili Turbe generala Izeta Nanića, Sportsku dvoranu Bužim i mjesto na kojem se planira raditi Trg Alije Izetbegovića.

Načelnici ove dvije općine su u ugodnoj radnoj atmosferi došli do zajedničkih zaključaka i konstatovali kako je potrebno uspostaviti jaču međusobnu saradnju. Konkretizacija planova iznesenih na sastanku očekuje se na narednom zvaničnom susretu delegacija dviju općina, što se očekuje tokom narednih mjeseci.

## PRIJEM ZA DOBITNIKE NAJVIŠIH RATNIH PRIZNANJA



Svečanim prijemom dobitnika najviših ratnih priznanja i porodica poginulih dobitnika Zlatnog ljiljana i Srebrnog štita sa područja općine Bužim započeto je obilježavanje Dan zlatnih ljiljana koji se tradicionalno obilježava 9.maja. Zbog početka ramazana ove godine je pri-

jem Kod općinskog načelnika upriličen nekoliko dana ranije. Prilikom obraćanja dobitnicima značke Zlatni ljiljan i porodicama poginulih dobitnika ovog priznanja načelnik Nanić je posebno naglasio da se borba i danas nastavlja ali na drugi način i projektima koji će poboljšati uslove života stanovnika Općine Bužim.

– „Čestitam vam dan Zlatnih ljiljana kojeg ove godine obilježavamo nešto ranije zbog nastupajućeg mjeseca ramazana. Želim Vam prije svega puno zdravlja i sreće u životu i da što lakše i bolje provedete ove ramazanske dane koji su pred nama“ - istakao je načelnik Nanić.

Ovogodišnja centralna manifestacija obilježavanja “Dana Zlatnih ljiljana” koju organizuje Federalni Savez dobitnika najvećih ratnih priznanja održati će se u Goraždu gdje će prisustvovati i dobitnici ovog priznanja sa područja Općine Bužim.



## NAČELNIK NANIĆ NA OBILJEŽAVANJU DANA DŽEMATA U KOČEVJU



**N**a poziv domaćina Općinski načelnik Općine Bužim Mersudin Nanić je svojim prisustvom uvećao svečanost obilježavanja Dana džemata u Kočevju R. Slovenija. Kako Općina Bužim ima prijateljske odnose sa Općinom Kočevje, načelnik Nanić želio je da se ta dobra praksa nastavi i u budućnosti. Jedna zanimljivost koja je privukla pažnju jeste svakako ime našeg generala Izeta Nanića na dresovima ekipe iz džemata Maribor.

Ništa tu ne bi bilo čudno i neočekivano da u ekipi ima

neko od Krajišnika ili Bužimljana. Ovu ekipu čine igrači iz svih drugih dijelova BiH. Ovo je još jedan od dokaza da će se ime našeg generala Izeta Nanića ako Bog da, prenositi sa koljena na koljeno, onako kako kaže pjesma: "Zauvijek će živjeti slavno ime Nanića". Nakon sportskih aktivnosti kojima je obilježen Dan džemata upriličeno je druženje gdje se načelnik Nanić družio se našim sugrađanima koji žive i rade u R. Sloveniji.

## NAČELNIK OPĆINE BUŽIM POSJETIO MUFTIJU BIHAČKOG



muftiji, te sam iskoristio priliku da mu čestitam i da s njim razmijenim nekoliko važnih tema za općinu Bužim i Islamsku zajednicu." – istakao je načelnik Nanić.

Razgovarali su i o apliciranju općine Bužim na fondove za vjerske zajednice sa viših nivoa vlasti kako bi se adekvatno odgovorilo svim potrebama koje imaju vjernici u općini Bužim, a što je općina Bužim do sada već uspjela uraditi. S druge strane Muftija bihački hafiz Mehmed-ef. Kudić zahvalio se načelniku općine Bužim na posjeti, te istakao da je saradnja općine Bužim i Medžlisa IZ Bužim na visokom nivou i da se ona treba stalno unapređivati i njegovati, te se zahvalio načelniku što je na poklon muftiji darovao bajrak Islamske zajednice i zastavu Bošnjackog naroda (zastavu sa ljiljanima).

„Od posebnog značaja je saradnja lokalnih struktura vlasti i Islamske zajednice s obzirom da je u interesu Islamske zajednice kvalitetniji život našeg čovjeka, a to je primarna zadaća i lokalne vlasti. S druge strane, mnogo je vjerskih sadržaja u općini Bužim tokom obilježavanja važnih datuma iz proteklog odbrambeno-oslobodilačkog rata koje treba unapređivati i kvalitetnim sadržajem obogatiti. Islamska zajednice će zajedno sa općinom Bužim raditi na tome da se već postojeći sadržaji unaprijeđe.“ - rekao je u izjavi muftija hafiz Mehmed-ef. Kudić. Sastanku je prisustvovao Mensur-ef. Čehić, rukovodilac Službe za vjerske poslove i obrazovanje Muftijstva bihačkog i Nazif-ef. Horozović, Koordinator Muftijstva za medije.

## U SARAJEVU NAČELNIK NANIĆ PRISUSTVOVAO PROMOCIJI KNJIGE “BREZA 94”



**B**REZA-94: bužimska bosanska bitka”, autora Seada Jusića promovirana je i u Sarajevu, u prostoru Memorijalnog centra Kovači. Knjiga je plod dugogodišnjeg rada ovog komadanta 505. brigade, nastala iz potrebe da se spasi od zaborava jedna od najvažnijih bitaka u minulom ratu. Pobjednička je to priča Viteške bužimske brigade i legendarnog komandanta Izeta Nanića, a autor knjige, njegov nasljednik na čelu bužimskih vitezova, na izvanredan način donosi djelo o pobjedničkoj bosanskoj priči.

– Značajno je da se promocija ove knjige dešava u glavnom gradu. Jučer je bilo 25 godina od jedne od najblistavijih pobjeda Armije RBiH, kada smo mi, 505. Viteška, pod komandom Izeta Nanića slomili operaciju pod nazivom Breza 94, koju je takvu i sa određenim strateškim ciljevima kreirao Ratko Mladić. Obilježavamo naše događaje u raznim prilikama, ali to obilježavanje moramo nastaviti kroz naučnu i kvalitetnu elaboraciju, argumentiranim zapisima i dokazima, pa i spomen obilježjima, ostavljati u nasljeđe generacijama koje dolaze, da znaju da su oni nasljednici ljudi koji su bili u stanju boriti se i pobjeđivati. Ne samo biti genocidirani i protjerani i rastjerani. Naša budućnost mora počivati na ponosu. Kao što se ponosimo Džekom, pjesnikom, umjetnikom, tako se moramo ponositi i ljudima poput Nanića, Dudakovića, raznih ljudi heroja. U tom smislu je ova priča jako važna- kazao je autor knjige Jusić. Izdavač knjige je Udruženje 505. viteška bužimska brigada kao i Bošnjačka zajednica kulture Preporod, u čije ime se obratio njen predsjednik Sanjin Kodrić.

– Želim ukazati na važnost kulture sjećanja, a samim tim i važnost ove knjige. Živimo u vremenu opterećenom politikom, i mislimo da politika oblikuje naš identitet, ali ne. Kultura sjećanja ga oblikuje. Bez sjećanja jedne zajednice ne možete živjeti život u trenutku savremenosti. Sadašnjosti nema bez prošlosti, kao ni budućnosti. Ova knjiga je tipičan primjer kulture sjećanja. Historijske bitke ne vode se samo na ratištima, tu borbu 505. Viteške brigade nastavlja ova knjiga. Artikulira našu svijest o herojstvu i odanosti BiH. Ovo je knjiga sa stavom- istakao je Kodrić.

Pored promotora, autora i izdavača knjige, na promociji je govorio i načelnik Općine Bužim, Mersudin Nanić, koji je kazao kako je ovo vjerovatno prvi put da se o ovoj bitci govori u Sarajevu. Želja je da se identifikujemo sa našim slavnim borcima koji su odbranili ovu zemlju, da o Brezi govorimo u Sarajevu, Goraždu, Travniku ali isto tako da u Bužimu govorimo Sarajlije o bitci na Žući, borci iz Goražda, Travnika i drugih gradova o svojim bitkama i pobjedama. Autoru je čestitao na objavljenoj knjizi te izrazio želju da će to biti samo prva u nizu djela koja tematiziraju bitke 505. viteške brigade.



## U DRUŠTVU NAJBOLJIH: PRIJEM ZA UČENIKE GENERACIJE




U sali Općine Bužim Općinski načelnik Mersudin Nanić upriličio je prijem za učenike generacije Osnovnih i Srednje mješovite škole sa područja općine Bužim za školsku 2018/2019. godinu. Prijemu su, pored najboljih proglašanih učenika prisustvovali i njihovi roditelji. Ovogodišnji učenici generacije su Ičanović Delila MSŠ "Bužim" ( četverogodišnja škola ) Balčinović Dženana MSŠ "Bužim" ( trogodišnja škola ), Aldžić Hana OŠ "Bužim", Kauković Amina OŠ "Konjodor" i Kovačević Anes OŠ "Čavnik" Čava. Pored navedenih prijemu je prisustvovao i učenik Cinac Esad, Bužimljanin koji je

proglašen učenikom generacije u MSŠ „Husein Džanić“ iz Velike Kladaše. Učenicima je dodijeljen poklon kao znak pažnje, kao i novčana nagrada.

„Čestitam ponosnim roditeljima i vama koji ste ove godine proglašeni najboljim u svojim školama. Nadam se da ćete i u svom daljem školovanju biti primjer kako se najbolje predstavlja svoja općina i mjesto iz kojeg dolazite, da će vam stečena znanja pomoći da budete najbolji gdje god nastavili svoje školovanje“ kazao je načelnik Mersudin Nanić.

## OPĆINSKI NAČELNIK PODRŽAO AKCIJU “UDRUŽENJA MLADIH LUBARDA”



Udruženje mladih Lubarda pokrenulo je i uspješno realizovalo akciju čišćenja puta Lubarda-Nanića stanica. Općina Bužim, predvođena načelnikom Mersudinom Nanićem, kontinuirano iz budžeta izdvaja sredstva za one projekte od koji će svi građani imati korist. Tako je i za ovaj projekat iz rezerve budžeta izdvojeno 800,00 KM kako bi mještani mogli obezbijediti osnovni alat za ovu zaista hvale vrijednu akciju. Načelnik Nanić sa saradnicima obišao je radove i tom prilikom istakao da će u narednom periodu podržavati projekte koji za cilj imaju kvalitetnije i efikasnije održavanje čistoće na području naše općine. Načelnik je ovom prilikom pohvalio rad Udruženja mladih Lubarde, te naglasio da ova današnja akcija ima posebno mjesto, obzirom da se uređuje put koji vodi prema Velikoj Kladaši, te džamiji u mjesnoj zajednici Lubarda koja je proglašena nacionalnim spomenikom, i do

prije nekoliko dana njegova otežana prohodnost je zadavala mnoge probleme svima onima koji su prolazili pomenutim putem.

„Ovim putem se zahvaljujem mještanima koji su pomogli da se očisti put Lubarda-Nanića stanica, te čišćenje prostora oko MZ Lubarda i čišćenje harema nove i stare džamije u našoj mjesnoj zajednici. Isto tako zahvaljujem se i načelniku općine Mersudinu Naniću, koji je pomogao da se ovaj projekat na zadovoljstvo svih nas i uradi, izjavio je predsjednik Udruženja mladih Lubarda Amir Odošić.“

## PRIJEM ZA RATNOG KOMANDANTA 505.VITEŠKE BRIGADE SEADA JUSIĆA



**N**ačelnik općine Bužim Mersudin Nanić sa sardnicima i Koordinacijom boračkih udruženja Općine Bužim upriličio je prijem za pukovnika Seada Jusića, zamjenika ministra odbrane BiH, ratnog komandanta 505. viteške brigade 5. korpusa Armije BiH i autora knjige "Breza '94" koja je promovisana u Bužimu 15. augusta 2019. godine i 13. septembra u Sarajevu, na dvadeset i petu godišnjicu operacije „Breza-94“. Načelnik Nanić se zahvalio pukovniku Jusiću na vremenu koje je izdvojio da posjeti Općinu Bužim, te naglasio kako vjeruje da će knjiga „Breza-94“ –BUŽIMSKA BOSANSKA BITKA postati obavezno štivo svim budućim generacijama, kako bi se na najbolji mogući i originalni način sačuvalo sjećanje na jednu od najvećih bitaka 505.viteške brigade.

–„Dobra saradnja sa koordinacijom boračkih udruženja nastaviće se i u budućnosti jer je to naša obaveza. Očekujem da će se izraditi idejno uređenje , glavni projekat i izgradnja spomen obilježja na Križu kako bi se zaokružila

jedna kompletna slika o 505.viteškoj brigadi, njenom komandantu i bužimskom vitezovima. Općina Bužim stoji na raspolaganju boračkim udruženjima i uvjerena sam da ćemo zajedničkim snagama raditi na izgradnji ovog projekta ali i na održavanju svih do sada igradenih spomen obilježja“.-istakao je načelnik Mesudin Nanić.

Sead Jusić, trenutno na dužnosti zamjenika ministra odbrane BiH, rekao je kako se ništa ne dešava slučajno, pa tako i promocija ove knjige koja je održana na godišnjicu osnivanja brigade u Bužimu, a nakon toga i u glavnom gradu Bosne i Hercegovine na 25-tu godišnjicu bitke Breza-94.

–„ Knjiga je moj dug prema rahmetli komandantu Izetu Naniću, svim Bužimljanima i saborcima koji su dali živote u oslobodilačkim bitkama i blistavim pobjedama. Moramo pisati i ostavljati traga jer sjećanja polako izbljede i bitne stvari se zaboravljaju. Moramo mijenjati naše navike i svi zajedno dati svoj doprinos jer sam uvjeren da niko drugi to neće uraditi umjesto nas. Na kraju želim reći da stojim na raspolaganju načelniku i lokalnoj zajednici u bilo kom smislu jer vjerujem da još uvijek mogu pomoći oko realizacije projekata potrebnih ovoj mladoj lokalnoj zajednici.“ – istako je pukovnik Jusić.

Predsjednik Koordinacije boračkih udruženja općine Bužim i predsjednik Organizacionog odbora za obilježavanje značajnih datuma Edham Eminić govorio je u projektima koji su urađeni, kao i planovima za narednu godinu sa posebnim akcentom na rješavanje spornih pitanja oko početka izgradnje muzeja u zgradi stare Osnovne škole.

## OPĆINSKI NAČELNIK HITNO INTERVENISAO SA 5.000,00 KM ZA SANACIJU KROVA OSNOVNE ŠKOLE MIRSAD SALKIĆ – ČAVA



**N**a poziv uposlenika Osnovne škole "Mirsad Salkić-Džaja" i mještana MZ Čava načelnik Općine Bužim Mersudin Nanić posjetio je ovu obrazovnu ustanovu koja je prije dva dana teško oštećena u požaru. U cilju privremene sanacije i zaštite objekta od daljeg propadanja i veće štete mještani Čave i uposlenici ove škole su se samorganizirali i počeli sa čišćenjem i privremenom zaštitom objekta. Kako se ovih dana očekuju padavine koje bi uzrokovale nepopravljivu štetu na unu-

trašnjosti objekta uposlenici i mještani su zatražili pomoć od općinskog načelnika u obezbjeđivanju određene količine drvene građe, folije i drugog potrebnog materijala za privremenu zaštitu objekta. Općinski načelnik općine Bužim danas je odobrio 5.000,00 KM iz budžetske rezerve za kupovinu građevinskog materijala potrebnog za privremenu zaštitu objekta, dok će mještani i uposlenici ove obrazovne ustanove sami izvršiti radove tokom vikenda. Ako to dozvole vremenski uslovi krovšte Osnovne škole će ovom hitnom intervencijom biti privremeno zaštićeno kako bi se sačuvala unutrašnjost objekta i još veća šteta.

## OPĆINU BUŽIM POSJETILA DELAGACIJA IZ BRATSKE OPĆINE ALTINOVA - R. TURSKA



U posjeti općini Bužim i općinskom načelniku Mersudinu Naniću boravila je delegacija općine Altinova, a povod je uspostavljanje još jače međusobne saradnje između općine Bužim i bratske općine Altinova. Prijemu su prisustvovali privrednici sa područja općine Bužim, koji grade poslovne objekte u Bužimu, te su bitan faktor razvoja općine Bužim i pored toga zapošljavaju veliki broj naših sugrađana. Nakon radnog sastanka delegacija iz Turske zajedno sa domaćinima obišla je Turbe Generala Izeta Nanića i poginulih pripadnika 505. viteške brigade, Muzej sobu 505. viteške brigade, Stari grad i Staru drvenu džamiju, gdje su obavili džumu namaz u najstarijoj drvenoj džamiji na Balkanu.

„Velika nam je čast što smo danas u herojskom Gradu Bužimu. Ovo je ujedno i radna posjeta gdje se trudimo i nastojimo da na još bolji način povećamo saradnju bilo na ekonomskom, kulturnom, sportskom, obrazovanom i ostalim nivoima između naših Općina, - poručila je delegacija bratske općine Altinova nakon današnjeg sastanka.

Ujedno upućen je zvaničan poziv da delegacija općine Bužim u što skorije vrijeme posjeti Tursku tj. Altinovu. U razgovoru je također najavljeno da će delegacija općine Bužim sa privrednicima prilikom posjete Turskoj prezentirati i aplicirati projekte koji će donijeti razvoj i prosperitet općine Bužim.

„Zadovoljstvo mi je što mogu danas sa privrednicima ugostiti delegaciju bratske općine Altinova. Prezentovani su određeni projekti koje trenutno radi općina Bužim. U narednom periodu zasigurno nastaviti ćemo saradnju na privrednom, ekonomskom, kulturnom, sportskom i obrazovnom području i na uspostavljanju još čvršćih prijateljskih veza. Konkretizacija planova iznesenih na sastanku očekuje se na narednom zvaničnom susretu delegacija dviju općina, što se očekuje tokom proljeća 2020. godina“ - kazao je načelnik općine Bužim Mersudin Nanić.

Predstavnici obje općine izrazili su zadovoljstvo načinom kako se za sada odvija saradnja između ove dvije općine te izrazili nadu da će u narednom periodu ta saradnja biti još intenzivnija te da će se ogledati i u realizaciji konkretnih

## NAČELNIK OPĆINE BUŽIM POSJETIO OPĆINU NOVI GRAD SARAJEVO



Novi Grad Sarajevo i države BiH Safeta Zajke.

Na sastanku je razgovarano o dosadašnjoj saradnji ove dvije općine.

„Izuzetno mi je drago da je načelnik općine Novi Grad Sarajevo Semir Efendić izrazio želju da se ponovo sastanemo, jer smo jedan ovakav sastanak održali u aprilu u općini Bužim. Mi sigurno imamo mnogo zajedničkih interesa i razloga da sarađujemo, da se nadopunjujemo i da prenosimo pozitivna iskustva i prakse. Dotakli smo se i drugih aktivnosti koje ćemo pokušati u narednom periodu i realizirati“ - naglasio je načelnik općine Bužim Mersudin Nanić.

Načelnik Općine Bužim, Mersudin Nanić je sa saradnicima upriličio uzvratnu posjetu Općini Novi Grad Sarajevo gdje se sastao sa načelnikom Semirom Efendićem i njegovim saradnicima.

Prije zvaničnog sastanka, obje delegacije zajedno su posjetile spomen obilježja svih šehida i heroja odbrane općine

## OPĆINSKI NAČELNIK PRISUSTVOVAO OBILJEŽAVANJU 26. GODIŠNJICE OSNIVANJA MSŠ "HASAN MUSIĆ" BUŽIM



se bori za opstanak škole, jer nam je to svima dužnost. Na

U prostorijama Mješovite srednje škole "Hasan Musić" u Bužimu upriličena je svečanost povodom 26 godina njenog postojanja. Naime, 01. 10. 1993. godine u ovoj školi se po prvi put čulo školsko zvonno. Svečanost je obilježena prigodnim programom, iako, kako je direktor Ibrahim Grošić naveo nešto skromnijim u odnosu na ranije godine. Program obilježavanja ove manifestacije vodile su učenice: Aldijana Dizdarević i Amina Bajrić. Na samom početku prisutnima se obratio direktor škole Ibrahim Grošić koji je pozdravio sve prisutne te ih upoznao sa teškim vremenima iz perioda samog osnivanja škole, zatim s ponosom istakao kako je MSŠ bila domaćin 11 Festivala rada koji se održao u aprilu ove godine. Isto tako, naveo je i osnovne ciljeve škole a to su da obezbjedi što veći kvalitet obrazovanja, privuče što veći broj učenika, da se poveže sa brojnim udruženjima te da se čuva emanet boraca kojeg su oni ostavili.

Nakon toga, prisutnima se obratio načelnik općine Bužim Mersudin Nanić koji je posebno naglasio da je vrijeme da

### Načelnik Nanić potpisao Protokol o postupanju u slučaju napuštanja i nepohađanja nastave



Načelnik općine Bužim Mersudin Nanić u Bihacu prisustvovao potpisivanju Protokola o postupanju u slučaju napuštanja i nepohađanja nastave. Potpisnici protokola su ministarstva obrazovanja unutrašnjih poslova i zdravstva, gradovi i općine sa područja USK-a, te nevladine organizacije "Žene sa Une" i "LAN" iz Bihaca.

kon njegovog obraćanja uručene su zahvalnice mentorima koji su zajedno sa svojim učenicima ostvarili zapažene rezultate na Festivalu rada, a potom su uručene i zahvalnice mentorima koji su sa učenicima ostvarili odlične rezultate na općinskim i kantonalnim takmičenjima. Potom je od strane učenika ove škole izvedena pjesma "Imam petlju", a potom i zanimljiv igrokaz koji je svima poslao jasnu poruku da ponekad ne trebamo suditi o profesorima iz prve ruke, jer su profesori upravo ti koji se trude da nam prenesu znanje. Nakon toga, uručene su zahvalnicime predstavnicima lokalne i kantonalne vlasti, direktorima i ljudima koji su od velikog značaja za opstanak škole. S ponosom možemo reći da je Mješovita srednja škola "Hasan Musić" Bužim iznjedrila brojne naučnike i intelektualce koji su danas od velikog značaja ne samo za grad Bužim, nego i za cijelu BiH pa i šire. Ovim putem, direktoru škole, profesorima, pomoćnim radnicima, učenicima sadašnjim, bivšim ili čak budućim čestitamo Dan škole.

Njime je usaglašeno zajedničko djelovanje strana potpisnica u cilju kontinuiranog rada na rješavanju problema napuštanja obrazovanja, a rezultat je trogodišnjeg projekta "Osnovno pravo na obrazovanje za svu djecu u BiH". Na osnovu ovog protokola stvorice se baza podataka kao putokaz za djelovanje. Prva instanca će biti škole, zatim MUP, te zatim i Centri za socijalni rad, a cilj je da se omogući uključivanje svakog djeteta u odgojno obrazovni proces.

## STARI GRAD BUŽIM KONAČNO DOBIO RASVJETU



**N**a Starom gradu Bužim u rad svečano puštena javna rasvjeta koja pored naselja osvjetljava dva bužimska nacionalna spomenika, Staru drvenu džamiju i Stari grad Bužim. U financiranju ovog projekta je učestvovala općina Bužim ali i mještani Starog grada. Rasvjetu je u pogon pustio općinski načelnik Mersudin Nanić, koji je u svom obraćanju izrazio zadovoljstvo realizacijom ovog projekta posebno kako kaže jer će dva nacionalna spomenika dobiti na atraktivnosti i turističkoj ponudi. Mještani takođe nisu krili zadovoljstvo, kako kažu Stari grad je davno trebao biti prioritet za ovaj projekat ali



## PREDSTAVLJEN IDEJNI PROJEKAT TRGA ALIJE IZETBEGOVIĆA



**U**Bužimu je 15.08.2019. godine, na dan završnice manifestacije "Slobodarski dani viteškog grada Bužima" na "Trgu Alije Izetbegovića", predstavljen je idejni projekat uređenja istog. Presentaciji idejnog projekata su prisustvovali član predsjedništva BiH Šefik Džaferović, federalni ministar poljoprivrede, vodoprivrede i šumarstva Šemsudin Dedić i federalni ministar raseljenih osoba i izbjeglica Edin Ramić, načelnik općine Bužim Mersudin Nanić, predstavnici MIZ-a Bužim, te brojni sugrađani. Šefik Džaferović, član predsjedništva BiH u svom obraćanju istakao je da lik i djelo rahmetli prvog predsjednika Nezavisne Republike Bosne i Hercegovine rahmetli Alije Izetbegovića zaslužuje da ovaj trg koji nosi njegovo ime bude završen, te istakao da će "snažno" podupirati i lobirati da do toga dođe u što skorije vrijeme, jer Bužimljani koji

su dali veliku žrtvu i doprinos u odbrani BiH to zaslužuju. "Večeras smo se ovdje okupili kako bi prezentirali idejno rješenje Trga Alije Izetbegovića koje je nakon deset godina ugledalo svijetlo dana. Do sada smo nakon što je općina Bužim definisala područje Trg Alije Izetbegovića od trga imali samo ovu ploču koja se nalazi iza naših leđa. Pokrenuli smo ovu stvar sa mrtve tačke i nakon razgovora sa našim počasnim građaninom gospodinom Nedžadom Brankovićem koji je obećao uraditi svome gradu jedan projekat, danas imamo urađeno idejno rješenje a u postupku je izdavanje i urbanističke dozvole. Bužimljani su skupo platili dobivanje ponovnog statusa općine Bužim. Procentualno smo najviše života dali u protekloj agresiji za našu domovinu. Naš rahmetli predsjednik Alija Izetbegovic 1995. godine svojim potpisom vratio je ponovni status općine Bužim. U znak zahvalnosti i za vječno sjećanje na našeg prvog predsjednika Bužimljani su prije deset godina ovaj prostor definisali kao trg koji će nositi ime Alije Izetbegovića. Danas smo ovdje da predstavimo ovo idejno rješenje koje će biti potrebno i realizirati. Iskreno se nadam i ubijeden sam da će SDA dati podršku ovom projektu, kao i svi oni koji vole i cijene sve ono što je uradio za ovaj narod prvi predsjednik Predsjedništva BiH Alija Izetbegović", kazao je u svom obraćanju načelnik općine Bužim Mersudin Nanić.

## NAPOKON ASFALTIRANA ULICA DR. IRFANA LJUBIJANKIĆA U CENTRU BUŽIMA



spomenute ulice u dužini od 50 metara bila je više nego neophodna, a vrijednost projekta je 12.000,00 KM u kojem zajedno učestvuju Kantonalna direkcija za ceste USK-a i Općina Bužim. Ovim projektom rješavamo dugogodišnje probleme koji se javljaju nakon svake veće kiše koja sa ove ulice na glavnu cestu nanese velike količine nasipnog materijala koji otežava normalno funkcionisanje saobraćaja.

„Puno je projekata pokrenuto sa mrtve tačke, a između ostalog i završetak ulice dr.Irfana Ljubijankića koju je trebalo davno završiti. Želim pozvati sebe i vas da se manje bavimo dnevno političkim prepucavanjima, već da radimo u interesu naše lokalne sredine i to svako u svojoj nadležnosti i mogućnosti, jer samo na taj način možemo očekivati bolje sutra svih nas i naše djece“ - kazao je načelnik Općine Bužim Mersudin Nanić.

**U**lica dr. Irfana Ljubijankića, koja se nalazi u samom centru Općine Bužim, a nakon sedam godina čekanja osvanula je u novom ruhu. Rekonstrukcija

## GRADIĆE SE JAVNA RASVJETA U MZ KONJODOR



**N**ačelnik općine Bužim Mersudin Nanić u Bihaću prisustvovao potpisivanju Protokola o postupanju u slučaju napuštanja i nepohađanja nastave. Potpisnici protokola su ministarstva obrazovanja unutrašnjih poslova i zdravstva, gradovi i općine sa područja USK-a, te nevladine organizacije “Žene sa Une” i “LAN” iz Bihaća. Njime je usaglašeno zajedničko djelovanje strana potpisnica u cilju kontinuiranog rada na rješavanju problema napuštanja obrazovanja, a rezultat je trogodišnjeg projekta “Osnovno pravo na obrazovanje za svu djecu u BiH”. Na osnovu ovog protokola stvoriće se baza podataka kao putokaz za djelovanje. Prva instanca će biti škole, zatim MUP, te zatim i Centri za socijalni rad, a cilj je da se omogućiti uključivanje svakog djeteta u odgojno obrazovni proces.

## USVOJENA HISTORIJSKA ODLUKA ZA OPĆINU BUŽIM



**O**pćinsko vijeće općine Bužim, a na prijedlog općinskog načelnika Mersudina Nanića, usvojilo je historijsku odluku o završetku izgradnje zaobilaznice čija se izgradnja čeka već duže od dvadeset godina. Naime, radi se o odluci o utvrđivanju javnog interesa za potpunu eksproprijaciju nekretnina u svrhu izgradnje dijela magistralne ceste M-4.3 obilaznica Bužim, dionica Radića Most-Bužim koja prolazi kroz sami centar Bužima.

**U**svojena je odluka koja je od općeg društvenog značaja za općinu Bužim, USK-a i Federaciju BiH. Ovakve odluke ne trebaju biti uopšte predmet bilo kakve političke rasprave jer se radi o projektu za sve građane naše Općine. Zahtjevom prema Općinskom vijeću kojeg sam uputio 02.09.2019. godine tražio sam sazivanje vanredne sjednice, kao i 06.09.2019.godine isto tako traženo je da se u dnevni red IX vanredne sjednice uvrsti kao tačka dnevnog reda ova odluka, te iz samo njima poznatih razloga navedna odluka nije dobila potrebnu većinu da se uopće uvrsti u dnevni red tadašnje sjednice. Drago mi je da se nakon mjesec dana ova odluka ponovo danas našla u dnevnom redu i da je nakon svih opstrukcija usvojena“, kazao je načelnik Nanić nakon usvajanje pomenute odluke.

**U** narednom periodu kreće realizacija usvojene odluke od koje će svi građani općine Bužim imati veliku korist. Sredstva za ovaj projekat obezbijedena su sa viših nivoa vlasti.



## PREZENTIRANO IDEJNO RJEŠENJE MUZEJA GRADA



**U** Ministarstvu obrazovanja, nauke, kulture i sporta Unsko sanskog kantona održan radni sastanak na kojem je načelnik Općine Bužim Mersudin Nanić predao idejno rješenje za izgradnju Muzeja grada Bužima sa zavičajnom zbirkom i Muzej sobom 505. viteške brigade. Pored načelnika Općine radnom sastanku su prisustvovali predsjednik Koorodinacije boračkih udruženja Općine Bužim Edham Eminić i kantonalni zastupnik Zikrija Duraković. Da bi inicijativa ugledala svjetlo dana saglasnost je moralo dati Ministarstvo obrazovanja, nauke kulture i sporta USK-a, odnosno Vlada USK, da bi konačnu odluku donijela Skupština USK-a. Stara OŠ "Bužim" je u jako neuslovnom i ruševnom stanju, i ovom inicijativom bi

trebao biti saniran kompletan krov zgrade ali i adaptirana unutrašnjost za realizaciju inicijative, pokretanja muzeja i stavljanje u funkciju istog. Vlada USK-a je već dala saglasnost na potpisivanje ugovora pa se očekuje da će Ministarstvo obrazovanja, nauke kulture i sporta USK-a uputiti prijedlog Skupštini Unsko sanskog kantona koja bi trebala donijeti konačnu odluku na prijedlog ugovora o sanaciji stare OŠ "Bužim" u kojem se planira smještaj Muzeja grada Bužima.

„Već nekoliko godina se radi na projektu Muzeja grada ali nije bilo dovoljno spremnosti da se ozbiljno i odgovorno odnosimo prema ovom veoma značajnom projektu za općinu Bužim. Danas smo konkretizirali stvari i pokrenuli proces koji nadamo se neće zaustaviti jer su ispunjene sve zakonske pretpostavke da Skupština kantona da konačnu saglasnost kako bi se moglo raditi na izradi glavnog projekta. Uvjeren sam da će do početka građevinske sezone biti sve spremno za sanaciju objekta stare škole u Bužimu“, - istakao je načelnik Općine Bužim Mersudin Nanić. Nakon što Skupština USK-a da saglasnost Ministarstvu obrazovanja, nauke, kulture i sporta na potpisivanje ugovora, općinski načelnik i direktor Osnovne škole "Bužim" potpiše ugovor i na taj način stvoriće se pretpostavke za izradu glavnog projekta i raspisivanje javnog poziva za sanaciju stare zgrade Osnovne škole „Bužim“ za čije potrebe su već i obezbijedena značajna novčana sredstva.

## OPĆINSKI NAČELNIK MERSUDIN NANIĆ OBIŠAO RADOVE U PODRUČNOJ ŠKOLI BUĆEVCI



**R**adovi u Područnoj školi Bućevci nastavljaju se i izvođe u punom kapacitetu i uskoro se očekuje njihov završetak, a obišao ih je i načelnik općine Bužim Mersudin Nanić u pratnji sa vijećnicima u Općinskom vijeću i direktorom Osnovne škole „Bužim“ Adnanom Nuhićem. Načelnik i direktor škole izrazili su zadovoljstvo tempom izvođenja radova i činjenicom da je izgradnja škole pri kraju, što će se obezbijediti optimalni uvjeti za

odgoj i obrazovanje za 83 učenika koja trenutno pohađaju pomenutu školu, a zaista njihovi roditelji i ostali mještani mjesne zajednice Bućevci to i zaslužuju. Posebno se zahvaljuju svima onima koji su na bilo koji način pomogli i doprinijeli da ovaj projekat ugleda svijetlost dana. Nakon završetka radova na unutrašnjem uređenju, izvođiće će se radovi i na vanjskom uređenju prostora oko Područne škole Bućevci.



## SVEČANO POTPISAN UGOVOR ZA IZGRADNJU MUZEJA GRADA BUŽIMA SA ZAVIČAJNOM ZBIRKOM I MUZEJ SOBOM 505. VITEŠKE BRIGADE



U sali općine Bužim svečano potpisan ugovor o ustupanju na korištenje dijela stare škole „7 NOVEMBAR“ Bužim sadašnjeg korisnika JU Osnovna škola „Bužim, koji podrazumijeva izgradnju Muzeja grada Bužim sa zavičajnom zbirkom i Muzej sobom 505. Viteške brigade. Nakon što je Vlada USK-a dala saglasnost na potpisivanje ugovora, a Skupština USK-a na osmoj sjednici potvrdila odluku, općinski načelnik Mersudin Nanić i direktor Osnovne škole “Bužim” Adnan Nuhić potpisali su ugovor i na taj način stvorio se uvjet za dalju implementaciju projekta, a koja će podrazumijevati poduzimanje niza radnji do konačne finalizacije i stavljanje objekta u funkciju namjene. Jedna od prvih radnji i možda najbitnijih jeste pribavljanje urbanističke saglasnosti kao osnove za izradu glavnog projekta rekonstrukcije ovog devastiranog objekta. Naravno, sve će to zahtijevati određeno vrijeme i predan rad, a tek kad se izradi glavni projekat biće poznato koja je potrebna visina ulaganja i stepen radova i koliko je neophodno dodatno obezbijediti novčanih sredstava. Svečanom potpisivanju ugovora prisustvovali su premijer USK-a Mustafa Ružnić sa Ministrom obrazovanja Damirom Omerdićem i Ministrom za boračka pitanja u Vladi USK Erminom Zulićem, zatim kantonalni zastupnici, predstavnici koordinacije boračkih udruženja i pred-

stavnici BZK “Preporod” Bužim.

„Općina Bužim pet godina čeka Muzej grada i spomen-sobu 505. Viteške. Zasigurno nije bilo spremnosti da se ozbiljno i odgovorno odnosimo prema ovom značajnom projektu za nas Bužimljane. Moram kazati da čim sam preuzeo mandat općinskog načelnika stavio sam se na raspolaganje kako bi priču oko izgradnje Muzeja priveli kraju, a rezultat toga je evo i svečano potpisivanje ugovora. Slijedi nam izrada glavnog projekta a nakon toga idemo u samu realizaciju. Što se tiče finansijske konstrukcije ona je pa skoro zatvorena. Kanton je izdvojio 200.000,00 KM, na računu Općine Bužim imamo 100.000,00 KM koja godinama prenose iz godine u godinu i imamo 130.000,00 KM donacija, što je ukupno 430.000,00 KM. Očekujemo od premijera USK-a i ministara u Vladi USK-a koji su danas sa nama da ova sredstva u što skorije vrijeme budu i operativna. Na kraju želim se zahvaliti svima onima koji su na bilo koji način dali svoj doprinos kako bi ovaj projekat ugledao svijetlost dana, - istakao je načelnik Općine Bužim Mersudin Nanić. „Zaista je zadovoljstvo danas biti u Bužimu jer prisustvujem svečanosti potpisivanja ugovora koji je značajan za sve Bužimljane. Ne treba u Bužim dolaziti samo pričati o herojstvu i 505. Viteškoj brigadi, ovdje treba doći sa konkretnim projektima kao što je ovaj danas. Sredstva koja imaju na trezoru Unsko-sanskog kantona u narednim danima bit će i operativna kako bi se što prije otpočelo sa realizacijom Muzeja grada Bužima“, kazao je premijer USK-a Mustafa Ružnić.

Pored premijera čestitke su još uputili ministri u Vladi USK-a, direktor Osnovne škole Bužim i predsjednik koordinacije boračkih udruženja. Izgradnjom Muzeja grada Bužima sa zavičajnom zbirkom i muzej sobom 505. Viteške brigade, smjestili bi se i konzervirali na adekvatan način već postojeći eksponati, ali i otvorila mogućnost za dalje prikupljanje istih kao i za dodatna istraživanja,

## NAČELNIK MERSUDIN NANIĆ DANAS U BIHAĆU POTPISAO UGOVOR O SUFINANCIJANJU PROJEKTA IZ EKOLOŠKIH NAKNADA



Načelnik općine Bužim Mersudin Nanić u Bihaću je prisustvovao zajedničkom potpisivanju ugovora između predstavnika lokalnih zajednica i resornog Ministarstvom za građenje, prostorno uređenje i

zaštitu okoliša. Načelnik Nanić je zajedno sa predstavnicima ostalih gradova USK-a u zgradi vlade, potpisao ugovor o dodjeli namjenskih sredstava iz ekoloških naknada za 2019. godinu sa pomenutim ministarstvom. Ugovori su potpisani za implementaciju projekata kojima su lokalne zajednice aplicirale za dodjelu ekoloških sredstava u 2019. godini. Ukupna vrijednost danas potpisanih ugovora za sve općine je 285.000,00 KM. U okviru sredstava i potpisanih ugovora općina Bužim sufinansirati će projekat izgradnja “LED RASVJETE” na području općine Bužim, a iznos sredstava koji je dodjeljen općini Bužim iznosi 16.685,00 KM. Rok za realizaciju projekta je 5 mjeseci od datuma doznačavanja sredstava.

## REKONSTRUKCIJA JAVNE RASVJETE KROZ CENTAR BUŽIMA



Općinski načelnik Mersudin Nanić, potpisao je ugovor o izvođenju radova na rekonstrukciji i sanaciji javne rasvjete u gradskom središtu općine Bužim sa direktorom poduzeća "MC Stella" iz Velike Kladuše. Ukupna vrijednost ugovorenih radova je 23.891,00 KM, a sredstva su obezbijeđena iz budžeta Općine Bužim i ekoloških naknada Ministarstva za građenje, prostorno uređenje i zaštitu okoliša Unsko sanskog kantona.

” U cilju smanjenja troškova za električnu energiju i održavanje javne rasvjete danas smo potpisali ugovor sa izvođačem radova koji će izvršiti zamjenu postojećih rasvjetnih tijela sa led sijalicama. U pripremi je još nekoliko projekata javnih rasvjeta po Mjesnim zajednicama koji će se realizirati u narednom periodu.”-kazao je načelnik Općine Bužim nakon potpisivanja ugovora.

## OSIGURANA NOVA SREDSTVA ZA ZAIBILAZNICU: 900.000 KM ZA EKSPROPRIJACIJU



Načelnik Općine Bužim Mersudin Nanić sa svojim timom posljednjih nekoliko mjeseci ubrzano radi na aktivnostima kojima bi zaobilaznica u Bužimu mogla biti konačno završena. U Sarajevu je tim povodom održan sastanak načelnika Mersudina Nanića sa ministrom u Vladi FBiH, Šemsudinom Dedićem i predstavnicima JP Ceste Federacije BiH. Na sastanku se razgovaralo o planiranju sredstava za izgradnju zaobilaznice u Budžetu Federacije BiH za 2020. godinu. Građanima Bužima za eksproprijaciju zemljišta na kompletnoj dionici zaobilaznice bit će isplaćeno skoro milion KM novih sredstava od strane JP Ceste Federacije BiH.

Načelnik Općine predložio je da se za godinu koja slijedi izdvoje sredstva u iznosu od 3,5 miliona KM čijim bi utroškom zaobilaznica mogla biti završena do Srednje škole u Bužimu. Zadovoljstvo mi je izvijestiti građane Općine Bužim da je dinamika radova JP Ceste Federacije

BiH, kao implementatora projekta eksproprijacije zemljišta na dionici izgradnje zaobilaznice za svaku pohvalu te da se unazad nekoliko mjeseci radilo na pripremi rješavanja imovinsko-pravnih odnosa te smo trenutno u fazi eksproprijacije zemljišta na navedenom dijelu trase koja čini sastavni dio magistralne ceste“, kazao je načelnik Nanić čiji je tim u kontinuiranoj komunikaciji s predstavnicima ovog javnog preduzeća.

Pohvalan je pristup načelnika Nanića rješavanju pitanja zaobilaznice koji bio vrlo operativan i ekspeditivan. Ovo je jedna od najbrže pripremljenih dokumentacija u odnosu na brojne druge lokalne zajednice u FBiH“, kazao je Dedo Pjanić, izvršni direktor za tehničke poslove JP Ceste FBiH. Važno je napomenuti da investitor odlukom može ući u posjede na trasi zaobilaznice dok će vlasnici imati priliku da svoja potraživanja za zemljište ostvare u Općini Bužim prema ranije utvrđenim kriterijima. U predstojećem periodu, organ uprave općine Bužim radit će u saradnji s JP Ceste FBiH na provođenju postupka eksproprijacije gdje imamo više od 90 parcela i 100 vlasnika s kojima trebamo zaključiti ugovore o eksproprijaciji i naplati potraživanja. Nadamo se da će već tokom naredne godine doći do početka izgradnje treće faze, kao ostatka trase na ukupnoj dionici“, saopćeno je iz Kabineta Općinskog načelnika.

”Želio bih se zahvaliti svima onima koji su na bilo koji način doprinjeli da se ovaj značajan projekat za naš kraj nastavi realizirati, a prvenstveno Vladi FBiH na čelu sa premjerom Fadilom Novalićem i ministru Dediću koji se i ranije zalagao za ovaj projekat kod Vlade FBiH“, kazao je Nanić.

## NAČELNIK NANIĆ I MINISTRICA DILBEROVIĆ POTPISALI UGOVOR: 100.000 KM ZA SANACIJU ŠKOLE U ČAVI



**N**ačelnik Općine Bužim Mersudin Nanić i ministrica Federalnog ministarstva za obrazovanje i nauku Elvira Dilberović danas su u Mostaru potpisali ugovor o finansijskoj pomoći za saniranje posljedica požara na Osnovnoj školi "Mirsad Salkić – Čava" u Bužimu. Vrijednost danas potpisanog ugovora je 100.000,00 KM. Naime, prije mjesec dana osnovnu školu u Čavi zahvatio je požar kojeg su uzrokovale neispravne instalacije pri čemu je uništena krovna konstrukcija i pričinjena velika materijalna šteta kako u holu škole tako i u učionicama a izgorio je i dio dokumentacije u školi.

"Ministarstvo je odmah reagiralo, nakon čega je Federalna vlada žurno i odobrila navedeni iznos za saniranje posljedica požara na bužimskoj osnovnoj školi.

Vjerujem da će i sanacioni radovi teći po planu i da će prostori škole što skorije ponovno biti spremni za učenike i nastavni proces. Na prvom mjestu su nam sigurnost djece i

njihovo zdravlje, uz osiguranje kvalitetnih i odgovarajućih uvjeta za učenje i rad", istakla je federalna ministrica obrazovanja i nauke prof.dr.Elvira Dilberović.

"Prije svega zadovoljstvo mi je što je upućenu inicijativu Vlada FBiH prepoznala kao prioritetnu i navedeni iznos odobrila za našu školu. Tim povodom želim da se zahvalim Vladi FBiH na čelu sa premijerom Fadilom Novalićem, kao i ministru Šemsudinu Dediću te ministrici Elviri Dilberović, koji su zaista uradili sve da se brzo obezbijede tražena sredstva. Također, pozivam i Vladu USK-a da slijedi primjer Vlade FBiH, te da obećani iznos od 70.000,00 KM u što skorije vrijeme uplati kako bi se mogle u potpunosti sanirati posljedice požara na Osnovnoj školi "Mirsad Salkić - Čava" u Bužimu. Na taj način naša djeca imala bi siguran krov nad glavom tokom pohađanja nastave i potpuno uslovne prostorije kakve zaslužuju", kazao je načelnik Općine Bužim Mersudin Nanić prilikom potpisivanja ugovora.

## POSTAVLJANJE LED RASVJETE: Značajna ušteda i bolja vidljivost



**U**Bužimu je u toku zamjena starih svjetiljki sa novom LED rasvjetom, kojom će biti pokrivenice 505. viteške brigade, Generala Izeta Nanića i naselje Pomajdan, te ovim projektom planiraju se osvijetliti prilazi osnove i srednje škole u Bužimu kao i Trg Alije Izetbegovića. Tim povodom općinski načelnik Mersudin Nanić obišao je danas radove kako bi se na licu mjesta uv-

jerio u dinamiku poslova. Vrijednost projekta je preko je 23.000.00 KM, obuhvata postavljanje novih 179 LED lampi. Sredstva su obezbijedjena iz budžeta Općine Bužim i ekoloških naknada Ministarstva za građenje, prostorno uređenje i zaštitu okoliša USK-a.

Uvođenje LED rasvjete, predstavlja važan korak u pravcu osavremenjivanja javne rasvjete na području naše Općine. Namjera općine Bužim je da modernizuje i učini boljom i efikasnijom cjelokupni sistem javne rasvjete. U narednom periodu nastavlja se sa realizacijom ovakvih projekata i u ostalim djelovima naše Općine u cilju uštede električne energije i postizanja većeg stepena energetske efikasnosti kada je u pitanju oblast javne rasvjete", kazao je općinski načelnik Mersudin Nanić prilikom obilaska radova.

## VODOVOD PIVNICE USKORO U FUNKCIJI



U sali općine Bužim upriličeno je potpisivanje ugovora za izvođenje radova na sanaciji vodovoda "Pivnice" u Mjesnoj zajednici Konjodor. Ugovor su potpisali načelnik općine Bužim Mersudin Nanić i predstavnik firme Elcom doo iz Tuzle Džemo Mustafić. Ukupna vrijednost radova iznosi 76.050,00 KM, a njima bi vodovod "Pivnice" trebao nakon sanacije biti pušten u rad. Rok za izvođenje radova je 30 dana od dana uvođenja izvođača radova u posao. Ako vremenski uslovi dozvole mještani mjesne zajednice Konjodor bi trebali na samom početku 2020. godine imati vodovod "Pivnice" u pogonu a

samim tim i pitku vodu u domaćinstvima. "Danas smo potpisali ugovor o sanaciji vodovoda "Pivnice", vodovoda koji već duži vremenski period nije u funkciji. Kroz narednih 7 dana očekujemo da izvođač radova bude uveden u radove, a u narednih mjesec dana sanacija, tako da bi već krajem januara naredne godine ili u februaru mještani mjesne zajednice "Konjodor" ponovo mogli da koriste vodu sa vodovoda Pivnice", kazao je načelnik općine Bužim Mersudin Nanić prilikom potpisivanja ugovora.

## POČELO ČIŠĆENJE KORITA RIJEKE BUŽIMNICE



Nakon provedene procedure oko izbora najpovoljnijeg ponuđača i potpisa ugovora, izvođač radova, firma „Velić-kop“ d.o.o. počela sa čišćenjem rijeke Bužimnice od mjesne zajednice Vrhovska prema mjesnoj zajednici Varoška Rijeka. Vrijednost radova je 79.469,91 KM, a rok za izvođenje istih je 45 dana. U vezi sa tim načelnik općine Bužim Mersudin Nanić je sa saradnicima obišao radove, te u svojoj izjavi pozvao vlasnike parcela uz rijeku Bužimnicu da se uključe i sijeku drveća uz korito i olakšaju čišćenje. Parcele će nakon proširivanja i čišćenja korita biti uređene, a korijenje i drveće će biti uklonjeno od strane izvođača radova. Inače, nakon svake obilnije kiše konstatovano je povećanje nivoa Bužimnice, a na nekim dijelovima i njeno izlivanje čemu uveliko doprinosi zapušeno i suženo korito, što će nadati se nakon čišćenja i završetka ovog projekta biti puno bolje, a rizik od poplava znatno smanjen.



## ODRŽANA PROMOCIJA ZBORNIKA NAUČNIH RADOVA



U Sali Islamskog kulturnog centra održana je promocija Zbornika naučnih radova na temu „Odgovornost za kulturu bošnjačkog naroda“. Organizatori promocije bili su Bošnjačka zajednica kulture „Preporod“ i Patriotska liga Bužim. Na početku promocije Zbornika prisutnim su se obratili domaćini i organizatori skupa Sead Šahinović ispred Patriotske lige Bužim, predsjedavajući Skupštine USK-a Agan Bunić, te Nedžad Kudelić vršilac dužnosti Općinskog načelnika Općine Bužim. Akademik Mujo Demirović govorio je više o aktuelnoj političkoj situaciji u Bosni i Hercegovini i regionu sa pose-

bnim akcentom na posljednja dešavanja i deklaraciju Hrvatskog narodnog sabora, Jedan od autora Zbornika naučnih radova prof. Husein Muratović govorio je o značaju održanih simpozija u proteklom vremenu, te napomenuo je da kultura Bošnjaka, kao i kultura svakog naroda, treba krenuti iz kuće, zatim obrazovnih, vjerskih i svih ostalih institucija države. Na kraju je naglasio kako će Zbornik biti ponuđen na razmatranje Ministarstvu obrazovanja, nauke, kulture i sporta, Univerzitetu u Bihaću, srednjim i osnovnim školama, kao i džematima.

## ODRŽANA PROMOCIJA KNJIGA I DRUŽENJE SA “SAROM SABRI”



U organizaciji JU Centar za kulturu, sport i informisanje Bužim je u prepunoj maloj sali održana promocija knjiga i druženje sa Sanelom Karišik-Begović, javnosti poznatijoj pod pseudonimom Sara Sabri. Sara Sabri rođena je 1984. godine u Novom Pazaru. U rodnom gradu je završila medresu, te upisala studij Bosanskog i srpskog jezika te Diplomaciju i međunarodne odnose. Majka je petero djece, a iza sebe ima 14 objavljenih knjiga; 12 za odrasle i dvije za djecu.

Posjetivši Krajinu, Sabri je održala promociju knjiga, kao i druženje i predavanje ženama u Bihaću, Cazinu i Bužimu. Neke od njenih objavljenih knjiga su “Šapućem ti kao žena ženi/žena mužu/kao svome sinu/majka majci/Sara Sabri” i druge.

Tema predavanja bila je “Kreirajmo kvalitetan život”, a ovom prilikom Sabri je govorila o stvarima koje bi trebale biti privilegije u životu; odgoju djece, obrazovanju, slobodi, ambicijama. Kako je sama majka petero djece, ali i prosvjetni radnik, Sabri je s prisutnima podijelila savjete i iskus-

tvo u vezi s odgojem djece.

Ono što je posebno naglasila u toku predavanja, u vezi s kreiranjem kvalitetnog života, bilo je kreiranje i nadogradnja ličnosti, kroz obrazovanje i cjeloživotno učenje, posebno kroz čitanje knjiga, kao prve riječi Stvoritelja: “Čitaj!” “Uradite za sebe sve što možete, idite na kurseve, predavanja, od toga vam samo može biti bolje. Proširite svoje ambicije, radite na sebi!”, poručila je Sabri prisutnima.



## ODRŽANA PROMOCIJA STRIP ALBUMA “KULIN- TAJNA SLANIH IZVORA” AUTORA ISMETA ERDIĆA



**U** Bužimu je u organizaciji JU “Centar za kulturu, sport i informisanje” Bužim i BZK “Preporod” Bužim održana promocija strip albuma “KULIN-TAJNA SLANIH IZVORA” autora Ismeta Erdića Erde, likovnog umjetnika, likovnog pedagoga, ilustratora, strip autora i rođenog Bužimljanina.

Promotori su bili Dževad Ponjević i Muhamed Kržalić, a dio teksta je čitala Rijalda Dizdarević, članica BZK „Preporod“ Bužim.

Bužimljani su kroz jedan sat mogli saznati više o tematici Erdićevih stripova, njegovoj inspiraciji za kreiranje istih, te planovima za budućnost.

Prema riječima autora, cilj mu je vrlo jednostavno biti socijalno angažiran, pričati priče o ljudima koji su dobri ili kritikovati loše ljude. Na kraju, cilj je ukazivati na sve devijacije i zla koja vladaju svijetom i pokušati ljudima ukazati da postoje i drugi način gledanja na svijet oko sebe. Naravno, kako kaže nije utopista pa da vjeruje da će promijeniti svijet, ali će svakako ispuniti svoju ljudsku zadaću, a to je da progovori kao čovjek o tome. Uloga umjetnika je, između ostalog da svojim radovima ukazuju na sve bolesti čovječanstva. To se čini kroz film, književnost, pozorište, slikarstvo, a vrlo kvalitetno se može ukazivati na zla svijeta i kroz strip i ilustraciju.

## ODIGRANA PREDSTAVA “BOSANSKI LONAC” U BUŽIMU



**U** produkciji teatarskih projekata Centra kulture i mladih Općine Centar Sarajevo, u organizaciji JU “Centar za kulturu, sport i informisanje” Bužim a u suradnji sa BZK Preporod Bužim i Općine BUŽIM, alternativna grupa Teatar komedije „Rajvosa“ na pozornici Velike sale JU “Centar za kulturu, sport i informisanje” Bužim izvela je svoju pozorišnu predstavu „Bosanski lonac“.

Komedija je to koja na duhovit i zabavan način govori o sukobu novog i starog, starosjediocima i pridošlicama, odnosu grada i sela, političkim igrama i ljudima na vlasti a obožavana je pikantnim okusom rodbinsko-stranačkih veza i „štela“, neodoljivim mirisom bijede i paraliziranog života običnog čovjeka. Niz komičnih i tragikomičnih situacija uz svakodnevnog života izazvali su puno smijeha. Predstava je izvedena u novoj adaptaciji i režiji Riada Ljutovića, po motivima teksta „Prognanici“ istaknutog bosanskoherce-

govačkog dramaturga Hasana Džafića, autora popularne televizijske serije „Viza za budućnost“ istaknutog bosanskohercegovačkog dramaturga, više puta nagrađivanog za komediografska i scenaristička ostvarenja. Obnovu predstave uradio je Riad Ljutović, adaptaciju teksta Edin Drljević, dok su muzičke numere preuzete od muzičkog sastava Dubioza kolektiv.

-Pored sijaset komičnih situacija, koje su našu publiku nasimijali do suza, ova predstava razotkriva šta je najveći problem današnjeg društva. To su te podjele, podjele po nacionalnoj osnovi, podjele između sela i grada, između mladih i starih... Nijedna podjela nije dobra. Ova predstava na kraju šalje divnu poruku, – predstava traje sati i četrdeset minuta, od toga sat i trideset i pet minuta je sukob između građana i seljaka, a na kraju vidimo da oni zaista mogu živjeti zajedno, kaže glumac Edin Drljević.

-Vidimo da njihova djeca prelaze te neke ograde, torove, što bi rekao naš prijatelj Josip Pejaković, u kojima smo mi zatvoreni, po bilo kojem ključu. Da su ti torovi totalno neracionalni, neprirodni. Stoga, mi zajedno, skupa s razumijevanjem i ljubavlju od ove zemlje možemo stvoriti jednu fantastičnu zemlju u kojoj ćemo svi uživati i imati prosperitet a naši mladi ljudi neće ići graditi Sloveniju, Austriju, Njemačku, već koristeći ove potencijale napraviti ponosnu i razvijenu Bosnu i Hercegovinu, naglasio je glumac Edin Drljević. U predstavi su igrali Amina Begović, Bakir Kumrić, Senka Oruč, Mirsad Imamović, Edin Drljević, Jasminka Požek Božuta i Aldin Tucić.

## HALIDA EMRIĆ, UMJETNICA IZ BUŽIMA NA FESTIVALU U IRANU



**H**alida Emrić umjetnica iz Bužima učestvovala je na Internacionalnom festivalu za žene u Iranskom gradu Tabriz od 15. do 20. juna ove godine, gdje je svoju zemlju predstavljala kao jedina učesnica umjetnica iz BiH.

Ispred ULUPUBIH-a s njom je učestvovala dr. Amila Smajović, svojim naučnim radom.

Na festivalu su učešće uzele predstavnice 27 zemalja širom svijeta, a domaćin je bio Islamski umjetnički Univerzitet Tabriz.

Festival je održan u organizaciji IRCICA, organizacije koja promovise islamske žene umjetnice. Sjedište ove organizacije je u Istanbulu u Turskoj.

Halida navodi da je ovo za nju bilo jako korisno i zanimljivo iskustvo, te da će isto pokušati uklopiti u svoj djelokrug rada.

Ona je održala "workshop" umjetničku radionicu sa demonstracijama svoje unikatne tehnologije zasnovane na evropskim iskustvima u modernoj umjetničkoj keramici.

Po završetku radionice susrela se sa dekanom islamskog univerziteta Tabriz te su razmijenili darove, a na poklon je dobila fragment perzijskog tepiha Azerbejdžanski Heriz starog stotinu godina.

Na festivalu je dostojno predstavila svoju domovinu Bosnu i Hercegovinu kroz više umjetničkih ciklusa, od motiva srednjevjekovne Bosne, sufi kulture, do modernih umjetničkih formi.

## ODRŽANO SEDMO BUŽIMSKO KNJIŽEVNO KAZIVANJE I LIKOVNI SALON



**U**sali Centra za kulturu, sport i informisanje je u okviru ovogodišnje manifestacije "Slobodarski dani viteškog grada Bužima" održano Sedmo bužimsko književno kazivanje i Sedmi bužimski likovni salon.

Ove godine bužimski likovni umjetnici su svoja djela kreirali u različitim likovnim medijima kao što su: keramika, slikarstvo, crtež, fotografija i strip. Tako je na ovogodišnjem likovnom salonu svoja umjetnička djela izlagalo desetak umjetnika iz svih kategorija. Po prvi puta bužimskoj publici se predstavila akademska slikarica Amina Sijamhodžić, te Ferida Kovačević, Hazer Emrić, Sead Emrić, Ismet Erdić, Said Mulalić, Nedžib Vučelj, Nedžad Vučelj, Amina Emrić, Halida Emrić i Sara Ibrahimpašić.

Za uvodnu riječ i ulogu umjetničkog kritičara bio je zadužen Sead Emrić. Skupu se obratio predsjednik BZK Preporod Bužim Muhamed Kržalić a zatim i v.d. direktor Centra za kulturu, sport i informisanje Vahidin Veladžić koji je zvanično otvorio ovu manifestaciju.

Kada je u pitanju Sedmo bužimsko književno kazivanje prisutni su imali priliku slušati književnika Nedžiba Vučelja, Lejlu Šahinović, Edinu Šekić, Safeta Emrića, Amira Sijamhodžića, Rijaldu Dizdarević, Dževada Ponjevića, Emi-na Grošića i Fehimu Balkić.

### ODRŽANO VEČE FOLKLORA I SEVDAHA

Slobodarski dani ulaze u svoju drugu polovinu brojnim kulturnim, sportskim i vjerskim sadržajima koji su i ove godine izuzetno dobro posjećeni. Tako je i večer Folklor i sevdaha privuklo nekoliko hiljada posjetilaca.

U okviru manifestacije "Slobodarski dani viteškog grada Bužima" pred nekoliko hiljada posjetitelja u Bužimu na platou Osnovne škole "Bužim, a u organizaciji KUD-a „Sevdah“ Bužim održano je veče „Folklor i sevdaha“.

Pored domaćina bužimskoj publici po prvi put se predstavilo i Kulturno-umjetničko društvo „Azra“ iz Rašljana-Brčko distrikt kao specijalni gosti. Ovo je kulturni sadržaj koji se u sklopu manifestacije Slobodarski dani viteškog grada Bužima organiziraju po šesti put.



## PROMOVISANA KNJIGA “BREZA-94 - BUŽIMSKA BOSANSKA BITKA” AUTORA SEADA JUSIĆA



**U** Bužimu je juče u sklopu manifestacije “Slobodarski dani viteškog grada Bužima” u prepunoj Velikoj sali JU “Centar za kulturu, sport i informisanje” Bužim promovisana Knjiga sa naslovom “BREZA ‘94: bužimska bosanska bitka”.

Pobjednička je to priča Viteške bužimske brigade i legendarnog komandanta Izeta Nanića.

Autor knjige, nasljednik komandanta Nanića na čelu bužimskih vitezova, Sead Jusić, prema ocjeni stručne javnosti i recenzenata ovog rukopisa, na izvanredan način donosi djelo o pobjedničkoj bosanskoj priči.

Naime, gotovo u konstantnoj poratnoj melanholiji koja proizilazi iz osjećaja žrtve (pobijeni, silovani, protjerani, zatvarani, spaljeni i porušeni), ova knjiga čitaoca prožima nadahnućem pobjeda koje su u toku odbrambeno-oslobodilačkog rata nizali Izet Nanić i njegova 505. Viteška brigada. Promotori su bili prof.dr. Vildana Pečenković i akademik Mujo Demirović, dok je sa vojnog aspekta o knjizi govorio general OSBiH ambasador BiH u Islamskoj republici Pakistan Sakib Forić. Moderator je bio Emin Grošić. Knjiga je plod je dugogodišnjeg rada, komandanta 505.-e brigade gospodina Seada Jusića. Nastala iz potrebe da se spasi od zaborava jedna od najvažnijih bitaka u minulom ratu. Izdavač knjige je Udruženje 505.-a viteška bužimska brigada kao i Bošnjačka zajednica kulture Preporod. Stručnu recenziju i lekturu uradili su eksperti pisane riječi i naučni radnici, doktori:

Vildana Pečenković, Selmo Cikotić, Senadin Lavić, te akademik Mujo Demirović.

Na kraju promocije prisutnima se obratio i autor Sead Jusić koji je posebno naglasio kako ova knjiga svjedoči o jednom vremenu, jednoj pobjedi i jednoj brigadi koja slavi samo svoje pobjede i uspjehe.

## IZLOŽBOM “KULIN” HALIDE EMRIĆ NASTAVLJENA SARADNJA IZMEĐU BUŽIMA I VISOKOG.



**U** Kulturnom centru Altindag u Visokom, povodom Dana grada, postavljena je izložba umjetničke keramike pod nazivom KULIN likovne umjetnice iz Bužima Halide Emrić.

Izložbu je otvorila gradonačelnica Visokog dr. Amra Babić, a o istoj je govorila dr. Amila Smajović, predsjednica UL-UPUBiH-a.

Halida Emrić, dizajner umjetničke keramike, rođena u Bihaću, živi i radi u Bužimu. Članica je Udruženja likovnih umjetnika primjenjenih umjetnosti Bosne i Hercegovine. Izlagala na brojnim izložbama u zemlji i inozemstvu. Osnovala Studio za izradu umjetničke keramike SerhatArt.

Svojom postavkom u izložbenom prostoru Kulturnog centra Altindag u Visokom, Halida Emrić predstavlja svoj umjetnički keramički opus iz više autorskih ciklusa. Na izložbi će se moći vidjeti radovi na više teme i to : Una iz mog sna, Kafa sa Japodima, Japodi 99, Dobri Bošnjani, te umjetnička keramika sa modernim formama. Njen posljednji autorski ciklus vezan je za kulturnu ostavštinu Kulina bana. Kolekcija “Kulin” autorice Halide Emrić prvi put je ove

godine izlagana na velikoj šestoaprilskoj izložbi Colegium artisticum u Sarajevu.

Postavka izložbe umjetničke keramike Halide Emrić u Kulturnom centru Altindag u Visokom sadrži preko 100 eksponata. Halida se pored svog korespondiranja sa modernim kretanjima umjetničke keramike u svijetu, intenzivno, skoro jednu deceniju, bavila istraživanjem bosanske kulturne baštine iz srednjovjekovnog perioda. Tako da je Bosna njena najveća inspiracija i na simboličkoj razini uvijek Halida u fundament svojim umjetničkih kompozicija ugrađuje simbole i kulturne kodove svoje domovine Bosne. Kada izrađuje nakit tada joj je uzor ogrlica kraljice Katarine, a za svoje velike i male sunčane krugove koristi motive stare bosanske heraldike, srednjovjekovne bosanske numizmatike i pečata iz dvorskih kancelarija Kraljevstva Bosanskog. Pored velike ljubavi prema kulturnoj baštini svoje zemlje koju nastoji ugraditi i prezentirati u svojoj umjetnosti, Halida Emrić svaki svoj umjetnički predmet obrađuje vlastitim umjetničkim senzibilitetom, nastoji ga uskladiti sa modernim umjetničkim kretanjima i tako mu podariti svoju energiju i stvoriti umjetnost koja sadrži sve elemente i estetsku razinu u vremenu u kojem je nastajala. Tako da se Halida ne zadržava na tradicionalnim tehnologijama već svojim stalnim istraživanjima i autorskom inventivnošću gradi svoja moderna umjetnička djela.

U posljednjoj njenoj autorskoj umjetničkoj kolekciji pod nazivom “Kulin” Halida Emrić za inspiraciju koristi povelju Kulina bana i Kulinovu nadgrobnu ploču sada u Zemaljskom muzeju Bosne i Hercegovine.

## PROMOVISANA KNJIGA “RADI TEBE” AUTORA JUSUFA BAJREKTAREVIĆA




U Velikoj sali JU “Centar za kulturu, sport i informisanje” Bužim, u sklopu obilježavanja velike bitke “Breza 94”, održana je promocija knjige “Radi tebe” autora Jusufa Bajrektarevića. Knjiga govori o putu hrabrih Krajišnika koji su tokom ’90-ih napustali udoban život u inostranstvu i zaputili se put BiH da brane svoju domovinu. Promociji je prisustvovao velik broj zvanica iz kulturnog i političkog života Bužima i šire.

Promotori su bili: Ermin Zulić – Ministar za pitanje boraca u Vladi USK, Jasmin Veladžić i Senad Kauković, dok je uvodničar bio Sead Emrić. Ismail Šahinović, učenik medrese “Džemaludin Čaušević” u pauzama je izveo nekoliko duhovnih pjesama. Prisutnima se u ime organizacionog odbora obratio Edham Eminić koji se zahvalio svima koji su zaslužni da se značajni datumi za Bužim obilježavaju i ne zaborave.

Prema riječima promotora knjiga je pečat događaja koji su uveliko doprinijeli odbrani RBiH, kako u vojnom tako i u moralnom smislu jer je iz zapadnih zemalja ovim putem na područje USK prešlo oko 1500 boraca koji su se priključili odbrani.

## 93. SAMOSTALNA IZLOŽBA BUŽIMSKOG UMJETNIKA SEADA EMRIĆA POSTAVLJENA U SLOVENIJI



Bužimski umjetnik Sead Emrić postavio je svoju 93. samostalnu izložbu u galeriji Lična Hiša u Sloveniji. Pokrovitelj ove izložbe je općina Ajdovščina.

U galeriji Lična Hiša postavljena je izložba recentnih slikarskih platana iz umjetničkog opusa SUMMA BOSNIACA. Na otvoru izložbe su govorili domaćini Polona i David Ličen.

Povodom obilježavanja 16. godišnjice rada galerije Lična Hiša nastupali su i učenici i profesori muzičke škole Vinko Vodopivec iz Ajdovščine.

O Emrićevom likovnom djelu u prigodnom katalogu izložbe pisala je likovna kritičarka Anamarija Stibilj Šajn.

“Sead Emrić, likovni umjetnik iz Bosne, uvijek se rado voli vratiti u Sloveniju. Kod nas je imao više uspješnih izložbi i predstavljanja. U slikarskom govoru izražava ideje koje proizlaze iz njegovog otkrivanja, poznavanja i praćenja povijesti i kulturne baštine Bosne i Hercegovine. Povezuje sve to bogatstvo prošlosti u višestruki konglomerat koji teži apstrakciji, ali mi u njegovoj umjetnosti još uvijek otkriva-

mo pejzaž i elemente mrtve prirode. U pogledu umjetnosti njegova su djela vrlo plemenita. Ona ne predstavljaju samo doprinos kulturnom bogatstvu njegova miljea, već i autorov originalni dijalog svega toga sa zapadnoeuropskim umjetničko-povijesnim stilovima, među kojima osjećamo art nouveau, secesiju i druge. Višeslojene tehnički, filigranski i umjetnički izrađene kreacije spajaju se u jedinstvene kompozicije i skladno uravnotežuju i kombinuju dva različita esprija.

Boje su sa kulturološkim duhom, sa moćnim bojenim vrijednostima među kojima je obavezna crvena i zlatna nadopunjena fluidnim crtežom.

Posebnost njegovog rada je i u bogatim strukturama koje na epidermalnoj ravni daju poseban šarm i pokazuju bogatstvo umjetničkih rezultata. Na slikarskoj površini boje također dobivaju nove vrijednosti.

Ispod epidermalnog sloja njegovih slika žive simbolička značenja i vječito aktuelne poruke.“

## BUŽIMSKI UMJETNICI NA X BIJENALU UMJETNOSTI MINIJATURE BOSNE I HERCEGOVINE



**M**anifestacija Bijenale umjetnosti minijature Bosne i Hercegovine je najveća likovna smotra malog formata u regiji, a Bosanski kulturni centar Tuzla je organizator i producent ovog uistinu značajnog događaja još od 2001. godine. Od tada pa do danas autori sa različitih strana svijeta i sa različitih kontinenata do-


prinose očuvanju minijature, te svojim kreativnim pristupom prevazilaze umjetničke i kulturološke razlike.

Radi se o jedinstvenoj i prepoznatljivoj manifestaciji koja ima ulogu afirmacije minijature kao specifičnog likovnog izraza. Cilj organizatora je da ovom manifestacijom sačuva minijaturu i na taj način podsjeti na njen značaj u likovnom stvaralaštvu BiH.

Deseto bijenale umjetnosti minijature Bosne i Hercegovine predstavilo je autore iz BiH, Srbije, Hrvatske, Crne Gore, Slovenije, Njemačke, Holandije, Italije, i drugih zemalja.

Na Javni konkurs za 10. Bijenale pristiglo je 450 radova od 146. autora, od čega je selekcijom odabran 391 rad od 135 autora. Na X Bijenalu umjetnosti minijature Bosne i Hercegovine svoje umjetničke radove izlagali su bužimski umjetnici: Halida, Hazer i Sead Emrić.

## ODRŽANA PROMOCIJA KNJIGE “NA PUTU KA VJEČNOSTI” AUTORICE DŽENANE MULALIĆ-NANIĆ



**U** Maloj sali “Centar za kulturu, sport i informisanje” u Bužimu, a u okviru manifestacije “Tebi evo Pejgamebere dragi” održana je promocija knjige “Na putu ka vječnosti” autorice Dženane Mulalić-Nanić.

Iako se radilo o skoro nepoznatoj mladoj autorici (živi u Lincu, Republika Austrija) predstavljanje njene knjige izazvalo je pažnju Bužimljana i Bužimljanki, koji su svojim prisustvom željeli da podrže mladu autoricu, ali i da saznaju o kakvom sadržaju je riječ.

O knjizi su govorili promotori mr. Eniz Veladžić, Emin ef. Grošić i autorica Dženana Mulalić-Nanić.

Mr. Eniz Veladžić je čestitao autorici na značajnom uspjehu i kazao kako je mnogo obrazovanih ljudi, ali se mali broj njih usudi napisati knjigu, pogotovo iz oblasti koja nije direktno izučavana, kao što je slučaj sa Dženanom, te je je izrazio zadovoljstvo što se autorica Dženana pokazala hrabrom, jer je gledajući kakav odnos imaju danas muslimani-Bošnjaci prema vjeri islamu, moralu, stidu..., reagovala knjigom kroz koju je, obrađujući različite naslove, željela da ukaže kakvi bi muslimani-Bošnjaci trebali biti, koliko su svjesni svoje dunjalučke uloge, Božije sveprisutnosti, Poslaničke upute itd.

Emin ef. Grošić se osvrnuo na knjigu iz ugla imama tj. s pozicije osobe kompetentne da ocijeni koliko je autorica, mada bez akademsko-vjerskog obrazovanja, uspjela da tretirajući, najvećim dijelom, teme naslovom i sadržinom prožete vjerskim izrazom, odgovori na pitanja kao što su: Život vjernika, Namaz – ključ dženneta, Jezik vjernika, Odgoj djeteta u islamu, Zima je proljeće za vjernike, Da li si jedan od sedmerice u hladu Arša, Ko je tvoj uzor, Kuća vjernik...

Autorica Dženana Mulalić-Nanić kako kaže, na svome prvijencu je radila dvije i po godine, a knjiga je rezultat njenog promišljanja o pitanjima na koja je, uglavnom, a shodno kur'anskim ajetima i hadisima Poslanika Muhammeda, a.s., dala odgovore u granicama intelektualnih mogućnosti s ciljem ne bi li u konačnici bili od koristi čitačkoj publici.

Recenzije knjige su napisale književnica Emina Mujanović i Sumeja Durić profesorica.

Inače autorica Dženana Mulalić-Nanić je rođena 07. septembra 1998. godine u Bužimu, gdje je završila osnovnu školu, a potom i gimnaziju “Hasan Musić“. Trenutno živi u Lincu, R Austrija.

## GAZIJE NA KONCERTIMA U AUSTRIJI, U ALPAMA SNIMILI KADROVE ZA NOVI



**H**or duhovne muzike i sevdaha "Gazija" iz Bužima je nakon određene stanke učestvovao na velikom koncertu u Lincu proteklog mjeseca, a zatim i u Gracu ovog vikenda, gdje je IKC Grac obilježavao 10 godina postojanja. Kao i uvijek Gazije su ostavili upečatljiv dojam i na najbolji mogući način promovisali općinu Bužim van granica naše države.

Članovi ovog bužimskog hora iskoristili su priliku i na atraktivnim lokacijama, tačnije na jezeru Grüner See u Alpama snimili kadrove za novi spot.

## GAZIJE NA OBILJEŽAVANJU DANA DRŽAVNOSTI U AUSTRIJSKOM GRADU KUFSTEIN

**B**užimski hor duhovne muzike i sevdaha "Gazija" boravio je u austrijskom gradu Kufstein.

Povod je bila manifestacija kojom je obilježen Dan državnosti BiH. Gazije su kao i uvijek svojim izvedbama dosljedno predstavili općinu iz koje dolaze i na taj način dali doprinos promovisanju općine Bužim, domovine Bosne i Hercegovine obilježavajući jedan od najbitnijih datuma u historiji, ali i kulturno-vjerskog identiteta Bošnjaka koji žive i rade u dijaspori.

Organizator je bio bošnjački džemat Kufstein, a sa Gazijama je zajedno putovao i Nermin Šabić – Hamza koji je na manifestaciji govorio o Danu državnosti BiH. Uvodničar je bio Senahid Makić, imam u džematu Kufstein.

Inače Gazije su dan ranije u Bihaću učestvovali na završnici manifestacije "U njemu je divan uzor" koja je održana u Kulturnom centru Bihać pred velikim brojem posjetitelja.



## ITINERARIUM – BUŽIMSKI UMJETNIČKI PROJEKAT U LJUBLJANI



**I**tinerarium, naziv je izložbe grafika i umjetničke keramike Seada i Halide Emrić koja je otvorena u galeriji Ekonomskog fakulteta u Ljubljani. Izložba je organizirana povodom 100 godina Univerziteta Ljubljana.

Halida Emrić, Bihać 1965. Likovna umjetnica, dizajnerica umjetničke keramike. Članica Udruženja likovnih umjetnika primjenjenih umjetnosti Bosne i Hercegovine. Učestvovala na brojnim samostalnim izložbama i simpozijumima u domovini i inostranstvu. Dobitnica je najviše nagrade za umjetnost u Bosni i Hercegovini Collegium artisticum 2015. i 2017. god.

Sead Emrić, Bihać 1965. Likovni umjetnik, slikar i grafičar. Član Udruženja likovnih umjetnika Bosne i Hercegovine. Do sada postavio 94 samostalne izložbe u zemlji i svijetu. Učesnik je brojnih simpozijuma i kolektivnih izložbi u domovini i inostranstvu. Dobitnik više nagrada za umjetnost.

### RAZSTAVA / IZLOŽBA

#### ITINERARIUM

Halida i Sead Emrić su bosanski umjetnici koji u mediju keramike i grafike pričaju najljepšu priču o kulturnoj prošlosti svoje domovine. Iz velikog obilja kulturnog naslijeđa Bosne i Hercegovine, autori izdvajaju 1530. godinu kada je iz Ljubljane prema Istanbulu krenula visoka carska delegacija. U delegaciji je službeno među trideset i sedam ljudi bio i slovenac Benedikt Kuripešič, komornik i tumač na latinski jezik. Delegacija je prošla kroz Bosnu, a na povratku u Ljubljani Benedikt Kuripešič je izdao ekskluzivni ITINERARIUM putopis u kojem je skicirao i izradio deset drvoreza sa prikazima starih bosanskih gradova. Likovno bogatstvo te historijski i kulturološki značaj Kuripešičevog putopisa kroz Bosnu je velika inspiracija ovim umjetnicima da na temelju tih činjenica stvaraju savremena likovna djela.

Likovni opus ovih autora nastoji prepoznati sve činjenice iz kulturne prošlosti Bosne u njenom hiljadugodišnjem postojanju, „od Kulina bana do dobrih dana“.

Slavica Zrakić

Moj gospodar, u

Zemlja zvana Bosna nesretna je zemlja koju ne vrijedi osvajati, još manje držati, ali se može podnijeti kao prijateljska...

Neka se Gospod smiluje ovoj zemlji. Dok ona sebe ne nađe, mi u njoj nema Bog zna šta da tražimo—

Derviš Sušić

## OPĆINSKI NAČELNIK DANAS POTPISAO UGOVOR ZA IMPLEMENTACIJU PROJEKTA UZGOJA PLANTAŽNOG KESTENA



U okviru Interreg IPA programa prekogranične saradnje u kojem učestvuju Hrvatska-Bosna i Hercegovina i Crna Gora, potpisan je ugovor za plantažni uzgoj kestena. Ugovor su potpisali načelnik općine Bužim Mersudin Nanić i direktor poduzeća "Berry project" d.o.o. iz Bihaća Mušić Nedžad kao izvođač radova na prvoj plantaži kestena koja će biti podignuta u MZ Radoč, u reonu Križa. Ukupna vrijednost projekta je 22.942,73 KM. Projekat "Zaštita i promocija kestena" financiran je grant sredstvima Interreg IPA Programa, a Općina Bužim u ovom projektu učestvuje sa 20% vlastitih sredstava. U Europskoj uniji najveći proizvođač i prerađivač plodova kestena je Italija, s proizvodnjom od oko 50.000 tona godišnje. Nakon nje, su Španjolska i Francuska. Kod nas se pitomi kesten praktično ne uzgaja, već je njegovo iskorištavanje svedeno na eksploataciju u šumi, tako da će prvi zasad kestena na ovom području biti dobra prilika i osnova za ozbiljniji pristup na očuvanju kestenovih šuma i podizanje proizvodnje kestena na jedan viši nivo.

## RADOVI NA PRVOJ PLANTAŽI KESTENA U TOKU, NAČELNIK NANIĆ OBIŠAO RADOVE



Nakon što je nedavno u okviru Interreg IPA programa prekogranične saradnje u kojem učestvuju Hrvatska, Bosna i Hercegovina i Crna Gora, potpisan ugovor za plantažni uzgoj kestena između općine Bužim i izvođača radova počeli su radovi na prvoj plantaži u MZ Radoč, u reonu Križa. Tim povodom, načelnik općine Bužim Mersudin Nanić danas je obišao parcelu na kojoj uveliko traju radovi oko sadnje kestena, te ograđivanja parcele. Radove izvodi JKP KOMB Bužim. Ukupna vrijednost projekta je 22.942,73 KM. Projekat "Zaštita i promocija kestena" financiran je grant sredstvima Interreg IPA Programa, a Općina Bužim u ovom projektu učestvuje sa 20% vlastitih sredstava. U Europskoj uniji najveći proizvođač i prerađivač plodova kestena je Italija, s proizvodnjom od oko 50.000 tona godišnje. Nakon nje, su Španjolska i Francuska. Kod nas se pitomi kesten praktično ne uzga-

ja, već je njegovo iskorištavanje svedeno na eksploataciju u šumi, tako da će prvi zasad kestena na ovom području biti dobra prilika i osnova za ozbiljniji pristup na očuvanju kestenovih šuma i podizanje proizvodnje kestena na jedan viši nivo. Najznačajnija lokacija kestena u Bosni i Hercegovini je upravo područje Cazinske krajine, a naročito okolina Pećigrada gdje se kesten nalazi na nadmorskoj visini od 300 do 400 m. Tu su zime hladnije nego u ostale dvije lokacije kestena u BiH, gdje je izdržao niske zimske temperature i do -23 stepena Celzijusa, a neke kratkotrajne i do -25 stepeni Celzijusa.

## ODRŽAN RADNI SASTANAK SA POLJOPRIVREDNICIMA



Općinski načelnik i Služba za razvoj i poduzetništvo organizirali su radni sastanak na kojem su prisustvovali predstavnici Udruženja poljoprivrednih proizvođača općine Bužim i Veterinarskih stanica koje rade na području općine. Sastanak je održan u sali Općine, a domaćin je bio općinski načelnik Mersudin Nanić, sa ciljem kvalitetnije organizacije i zajedničkog rada poljoprivrednih proizvođača i nadležnih službi. Poljoprivredni proizvođači su upoznati sa trenutnim stanjem i planiranim

aktivnostima Općine Bužim u ovoj godini, sa posebnim osvrtom na Program poticaja za 2019. godinu za poljoprivrednu proizvodnju. Razgovaralo se i o modalitetima za poticanje poljoprivrednih proizvođača, te dinamici isplata iznosa za poticaje. Poljoprivreda je vrlo perspektivno područje za razvoj poduzetništva na našim prostorima, pogotovo u vrijeme kada posla u drugim oblastima nema, a mladih ljudi je sve više na biroima za zapošljavanje. Malo je onih koji se odluče sami pokrenuti vlastiti biznis, ali i onih koji uopće žele raditi u oblasti poljoprivrede. Iako se u poljoprivrednu proizvodnju ulažu značajna sredstva iz budžeta (federalnog, kantonalnog, općinskog) proces prestrukturiranja, razvoja i povećanja poljoprivredne proizvodnje sporo teče, mada se mogu uočiti određeni pomoci. Poljoprivreda je jedini sektor koji sada još i radi u BiH, na žalost možemo očekivati da će bez potrebne reakcije vlasti i ona "pasti". Poljoprivreda se mora sačuvati, radi našeg opstanka, da bismo proizveli hranu i mogli preživjeti. Najvažnije raditi na podizanju svijesti naših potrošača o važnosti kupovine domaćih proizvoda koji su visokog kvaliteta, što bi spasilo domaću proizvodnju.

## NAČELNIK OPĆINE BUŽIM MERSUDIN NANIĆ OTVORIO DEVETI SAJAM ZDRAVE HRANE U BUŽIMU-„NAŠE DOMAĆE, SADA I UBUĐUĆE“



Tradicija, kultura i običaji predstavljaju odraz jednog društva i sredine, njihov identitet i ono po čemu su prepoznatljivi. Tako i područje Bosanske krajine ima svoju jedinstvenu kulturu, tradiciju i običaje. Od tradicionalnih jela trahane, maslenice, pekmeza do običaja, narodnih nošnji, folklor, tradicionalnih krajiških sijela i slično. Kako bi se očuvala tradicija, kultura i običaji, u velikoj sali Centra za kulturu, sport i informisanje Bužim Općinski načelnik otvorio je deveti po redu sajam Dani žene sa sela pod sloganom "Naše domaće – sada i ubuduće" u organizaciji Udruženja žena "Izvor" iz Bužima. Ovo Udruženje osnovano je 2004. godine i danas broji preko 300 vrijednih članica. Dani žene za sela imaju za cilj podizanje svijesti o važnosti žene u društvu, ukidanje margina na kojima se žene nalaze te odavanje priznanja njihovom radu i trudu. Žene imaju veliki značaj za razvoj ruralne sredine, unapređenja uvjeta života te smanjenja siromaštva na selu. Kao uvodni dio predstavili su se članovi nižeg uzrasta Udruženja žena "Ašik kaldrma" iz Velike Kladaše jednom folklor-

nom tačkom. Nakon toga, prisutnima se obratila Jasmira Mehić predsjednica Udruženja žena "Izvor" iz Bužima, koja je rekla kako je ponosna što je Bužimljanka, da Bužim ima dušu u odnosu na ostale gradove, te se zahvalila načelniku na odličnoj saradnji. Zatim se prisutnima obratio i Smail Toromanović, ispred Fonda za međunarodni razvoj poljoprivrede koji je ukazao na vrijednost jednog ovakvog sajma. Nakon toga, prisutnima se obratila i Arijana Vojić, v.d. Turističke zajednice USK koja je istakla da je ovakva manifestacija od izuzetne važnosti za razvoj turizma te navela kako će nastojati da udruženja ovakvog tipa i ovakve i slične manifestacije budu prepoznatljive i podržane. Na kraju, prisutnima se obratio i načelnik općine Bužim Mersudin Nanić koji je naglasio da je ovaj sajam nešto što se u Bužimu željno iščekuje i da treba da se podrži sve ono i sve one ljude koji rade za dobrobit zajednice. Isto tako, naveo je kako podrška općine Bužim i općinskog načelnika neće izostati te je ovogodišnji sajam proglasio otvorenim.

## NAČELNIK PRISUSTVOVAO OTVORANJU PRVE SAMOUSLUŽNE AUTOPRAONE



Samouslužna autopraona, koja je svečano otvorena, prva je takve vrste u Općini Bužim. „Samouslužni „CarWash“ sistem u svijetu je već odavno pravi hit, koji je naišao na široku primjenu kod vozača, dok kod nas tek treba da zaživi. Reakcije Bužimljana u prvim danima probnog rada praone, su pozitivne. „Ovo je velika investicija za našu lokalnu zajednicu. Vjerujem da je kvaliteta ponude izuzetno visoka jer se radi o modernoj samoposlužnoj autopraonica. Želim vlasniku puno poslovnog uspjeha i vjerujem da će ubrzo vratiti uloženi novac,“ kazao je načelnik općine Bužim Mersudin Nanić. Autopraonica se nalazi u ulici Generala Izeta Nanića bb, i na raspolaganju je u periodu od 24 sata dnevno, te nudi sve funkcije pranja kako bi vaš automobil bio potpuno čist za svega 5-6 minuta.

## POTPISANI UGOVORI ZA DODJELU DESET PLASTENIKA PO JAVNOM POZIVU



U maloj sali JU „Centar za informisanje, kulturu, sport i informisanje“ Bužim, upriličeno je potpisivanje ugovora za dodjelu plastenika. Riječ je o projektu Međunarodnog fonda za razvoj poljoprivrede (IFAD) i općine Bužim koja na ovaj način sufinancira poljoprivrednu proizvodnju. Cilj projekta je jačanje malih poljoprivrednih proizvođača, a posebna pažnja će biti posvećena ženama i mladima koji žele ostati na selu i koji u poljoprivredi vide šansu za zapošljavanje. Deset korisnika

je odabrano putem javnog poziva, a prioritet su imale nezaposlene osobe, mladi i žene sa područja općine Bužim koji imaju vlastito poljoprivredno zemljište u neposrednoj blizini stambenog objekta u kojem stanuju. Projekt nabavke plastenika za proizvodnju povrća u općini Bužim će se realizirati na bazi sufinansiranja tri aktera. Općina Bužim sufinancira nabavku plastenika površine 100 m<sup>2</sup> u iznosu od 30 % od ukupne vrijednosti plastenika, ostatak iznosa sufinancira PCU IFAD u iznosu od 40% i korisnici projekta financiraju ostatak iznosa. Pored plastenika od 100 kvadrata, korisnici će dobiti svu dodatnu opremu, sistem za navodnjavanje, odnosno kompletan paket kako bi se počelo s proizvodnjom. Nakon potpisivanja ugovora i uplate sredstava, ukoliko vremenski uvjeti dozvole planira se isporuka plastenika korisnicima u što kraćem periodu. Prilikom potpisivanja ugovora načelnik općine Bužim Mersudin Nanić čestitao je svim dobitnicima istih te im poželio puno sreće u plasteničkoj proizvodnji u nadi da će istu povećati i na taj način sufinancirati svoje porodice i egzistenciju na teritoriju općine Bužim.

## POTICAJ ZA 66 ČLANOVA UDRUŽENJA PČELARA “PROPOLIS” BUŽIM



Zahvaljujući suradnji Udruženja pčelara “Propolis“ sa Općinom Bužim, uspješno je realizirana još jedna aktivnost koja će biti od velike koristi domaćim pčelarima. Za ukupno 66 članova udruženja pčelara “Propolis“ iz Bužima, podijeljeno je ukupno 1613 pčelinjih pogača za prehranu pčela. Ukupna vrijednost ovog projekta iznosi 2.500 KM. Radi se o sredstvima planiranim grantom za poticaj poljoprivrednoj proizvodnji koja su dodijeljena na osnovu projekta Udruženja. Bitno je naglasiti kako će ova donacija biti od velike koristi, naročito nakon loše godine za pčelare, te će poslužiti za dodatnu prehranu pčela u zim-

skom periodu. Predsjednik udruženja “Propolis“ Isaković Šefket je izrazio zadovoljstvo realizacijom ovog projekta, te je uputio zahvalnost Općinskom načelniku, Službi za razvoj i poduzetništvo općine Bužim na iskazanoj podršci, uz očekivanje da će ovakav vid saradnje biti nastavljen i u narednom periodu. Udruženje pčelara će nastojati svojim aktivnostima i u narednom periodu uspostaviti bolju suradnju sa domaćim institucijama kao i međunarodnim organizacijama, a koje kroz različite projekte mogu pomoći domaćim pčelarima. Načelnik općine Bužim Mersudin Nanić prilikom podjele pogača naglasio je da će općina Bužim i ubuduće pružati podršku svim udruženjima koja ostvaruju rezultate i promovišu općinu Bužim, te u tom kontekstu posebno pohvalio pojedince pčelare koji su ostvarili zadivljujuće rezultate na takmičenjima kvaliteta pčelarskih proizvoda širom regije.

## NAČELNIK OPĆINE BUŽIM OBIŠAO KORISNIKE PROJEKTA DODJELE PLASTENIKA



**N**ačelnik Općine Bužim Mersudin Nanić obišao je korisnike projekta koji je realiziran u okviru IFAD-a, te se uvjerio u kvalitet sprovedenih radova. Prilikom posjete konstatovano je da su dobitnici plastenika u rekordnom roku izvršili pripremu zemljišta te ostale neophodne radnje za postavljanje plastenika. Načelnik Nanić izrazio je zadovoljstvo činjenicom da ove

porodice na svojim parcelama i plastenicima svojim radom zarađuju za egzistenciju, što je za svaku pohvalu.

Kao međunarodna institucija, IFAD je prvenstveno usmjeren na smanjenje siromaštva kroz zapošljavanje i unapređenje poljoprivrednih i drugih aktivnosti u ruralnim područjima.

Ovim projektima se, u pravom smislu te riječi, provode ciljevi ruralnog razvoja, jer osim direktnog ulaganja u poljoprivredu, obuhvaćaju izgradnju i obnovu infrastrukture, obuke i edukacije, dakle transfer znanja i novih vještina, što je jako bitno za unapređenje i modernizaciju poljoprivredne proizvodnje.

Međunarodni fond je u nabavci plastenika učestvovao sa 40 % grant sredstava, učešće općine je bilo 30 %, a poljoprivrednika 30%. Projekt je realiziran u roku od dva mjeseca. Korisnici su izrazili zadovoljstvo suradnjom sa IFAD-om, Općinom Bužim i Službom za razvoj i poduzetništvo.

## ODRŽAN STRUČNI SEMINAR O UZGOJU POVRĆA U ZAŠTIĆENOM PROSTORU



**U**Bužimu je održan stručni seminar iz oblasti poljoprivrede na temu: "Tehnologija proizvodnje presadnica i uzgoj povrća u zaštićenom području". Organizator je bila općina Bužim u suradnji sa Poljoprivrednim zavodom USK i Zadrugom Agrisan. Poljoprivredni proizvođači sa područja općine Bužim imali su priliku čuti korisne savjete stručnjaka iz ove oblasti. Inače na području Općine Bužim 89 poljoprivrednika se bave proizvodnjom povrća u zaštićenom prostoru (plastenicima), a ukupna površina plastenika iznosi 11280 m<sup>2</sup>. Karakteristično za ovu proizvodnju je usitnjenost površina tako da najveći dio poljoprivrednih gazdinstava posjeduje plastenike od 100 m<sup>2</sup>, njih 79 % dok je svega 2 % onih koji imaju 400 m<sup>2</sup> što se procjenjuje kao minimalna površina koja može omogućiti egzistenciju četveročlanoj porodici. Ovogodišnju proizvodnju (paradajz i paprike) proizvođači su plasirali na lokalno tržište, trgovinama na području općine i lokalnom stanovništvu. Prosječna proizvodnja



paradajza u plastenicima je 2000 kg, paprika 1000 kg što odgovara očekivanoj proizvodnji. U plastenicima se osim paradajza i paprike proizvodi i salata, mladi luk i špinat. Proizvodnja cvijeća i drugog ukrasnog bilja u plastenicima za sada se na području općine Bužim ne provodi iako ovakva proizvodnja ima perspektivu.

Zbog povećanih površina pod plastenicima očekuje se problem u prodaji poljoprivrednih proizvoda. Bužim nema registriranu zelenu pijacu, a promet prekupaca voća, povrća i drugih poljoprivrednih proizvoda odvija se na prostoru uz regionalni put, gotovo u samom centru grada ili u marketima.

Osnivanje "zelene pijace", edukacija proizvođača, poticanje ukupnjavanja proizvodnih jedinica, odnosno plastenika, udruživanje poljoprivrednih proizvođača u udruženja ili zadruge neke su od mjera za poboljšanje povrtlarske proizvodnje koje bi u budućnosti trebalo sprovesti.



## ZA POLJOPRIVREDNE POTICAJE 100.000,00 KM



Općina Bužim za poljoprivrednu proizvodnju isplatila poticaj skoro u 100 % iznosu, od 100.000,00 KM koliko je bilo planirano u Budžetu za 2019. godinu isplaćeno je 97.124,25 KM poljoprivrednicima koji su prijavili plan proizvodnje i na taj način ostvarili pravo na poticaj u određenoj oblasti poljoprivrede.

”Naš je cilj da se što više ljudi bavi poljoprivredom, da osnivaju obrte pa smo dali podršku ljudima koji su osnovali obrte. Posebno nas raduje činjenica da je sve veći je broj ljudi zainteresirani za nekom vrstom poljoprivredne proizvodnje ili osnivanje obrta, tako da ćemo i u narednoj godini u Budžetu planirati novčana sredstva za ovakav vid podrške našim sugrađanima“, kazao je načelnik općine Bužim Mersudin Nanić.

## ODRŽANO STRUČNO PREDAVANJE O ZAŠTITI BILJA



U maloj sali JU Centar za kulturu, sport i informisanje Bužim je održano stručno predavanje o “Integralnoj zaštiti bilja” i pravilnoj primjeni pesticida. Organizator je bio Poljoprivredni Zavod USK u suradnji sa općinom Bužim. Predavači su bili Tanja Veladžić, dipl.ing i Dalibor Dončić dipl.ing.

Prisutni poljoprivredni proizvođači sa područja općine Bužim, imali su priliku čuti o novim preparatima za zaštitu bilja, njihovoj pravilnoj upotrebi i primjeni, ali i razmijeniti mišljenja i dosadašnja iskustva.

## ODRŽAN STRUČNI SEMINAR “ANALIZA ZEMLJIŠTA I MJERE POBOLJŠANJA I ANALIZA MEDA”



Kako je Općina Bužim svojim Programom novčanih podrški za poljoprivrednu proizvodnju planirala “Monitoring korištenja zemljišta u plasteničkoj proizvodnji (hemijska analiza zemljišta) i podršku organiziranju pčelara kroz sufinanciranje analize meda, Općina Bužim, Služba za razvoj i poduzetništvo u suradnji sa Poljoprivrednim zavodom USK-a organizirala je danas stručni seminar: „Analiza zemljišta i mjere poboljšanja ” i “Analiza meda ” u maloj sali JU Centar za kulturu, sport i



informisanje Bužim.

Usaglašen je način provođenja projekta kojim će biti analizirano 70 uzoraka zemljišta poljoprivrednih proizvođača povrtnih kultura u plasteniku i 100 analiza meda .

Dogovoreno je da se uzorci zemljišta iz plastenika dostave 26.09.2019 u periodu od 9-14 sati na parkiralište zgrade Općine kako bi se mogli dostaviti Poljoprivrednom zavodu USK-a.

## U BUŽIMU ODRŽANA RADIONICA U OKVIRU PROJEKTA PROMOCIJE I ZAŠTITE KESTENA



U Bužimu je u Maloj sali JU “Centar za kulturu, sport i informisanje” Bužim održana radionica koju je organizirao Poljoprivredni zavod USK u suradnji sa općinom Bužim, a u sklopu projekta “Zaštita i promocija kestena” koji je sufinansiran iz Programa IPA Interreg prekogranična suradnja Hrvatska – Bosna i Hercegovina – Crna Gora 2014-2020.

Radionicu su vodili predavači Bekir Dolić dipl. ing. poljoprivrede, Šefik Rošić fitoterapeut i apiterapeut, Sulejman Alijagić profesor biologije i Adijana Jaganjac-Mehadžić dipl. ing.

Dalo se zaključiti da je značaj kestena kao autohtone medonosne biljke koja ima ogromne nutritivne vrijednosti velik, ali na žalost danas su ove šume napadnute raznim bolestima i bez pomoći državnih institucija teško da se mogu same oporaviti. Cilj ovih radionica jeste buđenje svi-

jesti svih nas.

Radionici su pored zainteresovanih građana općine Bužim i stručnjaka iz ove oblasti prisustvovali i učenici Srednje poljoprivredne škole MSŠ “Hasan Musić” Bužim koji su pokazali interes za ovu radionicu.

U narednim danima ovakve radionice će biti organizovane i u općini Velika kladaša i gradu Cazin koji su takođe dio ovog projekta.



## JKP KOMB BUŽIM POČEO IZGRADNJU OBJEKTA UPRAVNE ZGRADE I SMJEŠTAJA VOZNOG PARKA



Javno komunalno preduzeće “KOMB” Bužim ovih dana počelo je sa radovima na izgradnji upravne zgrade preduzeća i smještaja voznog parka.

Poznato je da JKP KOMB Bužim već 20 godina plaća zakup prostora u kojem boravi uprava ali i prostora za smještaj voznog parka. Izgradnjom vlastitog objekta planirane su



značajne uštede troškova koje sad imaju po osnovu zakupa. Objekat rade u naselju Kudelići nadomak Varoške Rijeke. Kako su naveli na svom službenom profilu, posebno su sretni jer su i pored svih poteškoća vlastitim sredstvima kupili zemljište i otpočeli sa izgradnjom objekta.

## NAČELNIK MERSUDIN NANIĆ URUČIO SPORTSKU OPREMU NK „VITEZ“



**N**ačelnik Općine Bužim Mersudin Nanić uručio je sportsku opremu Nogometnom klubu Vitez, a radi se o dva kompleta dresova i sportskih trenerki.

Primopredaji sportske opreme prisustvovali su igrači NK „Vitez“ sa trenerom Edhamom Eminićem.

„Željeli smo pomoći Klubu i igračima koji se takmiče trenutno u I Kantonalnoj ligi, a prioritet je povratak u viši rang jer nam je kao Općini i Klubu mjesto da se takmičimo u višem rangu. Naš sugrađanin koji je na privremenom radu u R Sloveniji je u razgovoru sa mnom izrazio želju da

na ovaj način pomogne NK „Vitez“. Za igrače Viteza, koji predstavljaju Općinu Bužim na najljepši način, uspjeli smo obezbijediti potpunu sportsku opremu u vrijednosti od oko 3.000,00 KM. Dakle, cilj nam je da pored finansijske pomoći iz budžeta nađemo i druge načine kojima ćemo pomoći sportskim klubovima. Današnja donacija sportske opreme je samo jedan od primjera kako se svi trebamo odnositi kada je u pitanju razvoj sporta u našem Bužimu. Mi ćemo i dalje nastaviti pomagati na svaki mogući način.“ -rekao je načelnik Mersudin Nanić.

“Ovakve donacije su uvijek dobrodošle. Ovom prilikom se zahvaljujem načelniku Mersudinu Naniću koji je našao donatora i sponzora, te nam omogućio ovakvu jednu opremu za Prvi tim. Mi sad rasterećeni i možemo se fokusirati na utakmice koje su pred nama. Svakako nam je cilj povratak u II ligu Federacije BiH, grupa Zapad. Na kraju se zahvaljujem donatoru koji nam je obezbijedio novu sportsku opremu, kao i sponzorima koji su uradili reklamu na našoj opremi, a to su firme Abi-Comerc, Kov-Grad i Klostermeier Majdan.” -rekao je trener NK Viteza Edham Eminić.

Podrška načelnika sportu kroz ovu donaciju je samo jedan od načina na koji doprinosi afirmaciji i razvoju sporta na području Općine Bužim. Cilj je doprinjeti razvoju sporta i motivisati mlade da se bave istim, te time poticati zdrav način života.

## NAČELNIK PRIMIO PREDSTAVNIKE TAEKWON-DO KLUBA „FADIL BAJREKTAREVIĆ“ I „HAMZA“



**N**ačelnik općine Mersudin Nanić primio je predstavnike i takmičare taekwondo kluba Fadil Bajrektarević Gazija koji predstavljaju reprezentaciju Bosne i Hercegovine na Svjetskom prvenstvu ITF TKD koje se ove godine održava u Minhenu (Inzell). Podršku Reprezentaciji BiH, u njihovom odlasku na Svjetsko prvenstvo pored Općinskog načelnika Mersudina Nanića, dobili su od Vlade USK-a, Sportskog saveza Općine Bužim, Sportskog saveza USK-a, i pravnih i fizičkih lica iz Bužima i Velike Kladuše.

–„Sportisti su najbolji ambasadori i promotori Bužima i sporta u zemlji i inostranstvu. Vjerujem da će se Reprez-



entacija BiH na svjetskom prvenstvu predstaviti na najbolji način i da ona stara izreka „važno je učestvovati“ kod nas Bužimljana ne vrijedi jer poznavajući naš mentalitet i karakter uvjeren sam da će te ostvariti dobar rezultat. Ja Vam prije svega želim puno sportske sreće i uspjeha i naravno da se vratite u Bužim sa medaljama“- istakao je načelnik Nanić prilikom obraćanja takmičarima i predstavnicima kluba.

Svjetsko prvenstvo se održava od 23.04. do 28.04. u Inzelli kod Minhena, a članovi reprezentacije iz Bužima su Krupić Naila TKD “Gazija” Vrhovska i Šahinović Amel TKD”Hamza” iz Bužima.

## NAČELNIK OPĆINE BUŽIM PRIMIO OSVAJAČE MEDALJA SA SVJETSKOG PRVENSTVA U TAEKWONDOU



**N**a Svjetskom Taekwondo prvenstvu koje je održano protekle sedmice u Inzelli – Njemačka, predstavnici Reprezentacije BiH iz dva bužimska kluba ostvarili su izuzetne rezultate i vratili se kući sa dvije medalje. Tim povodom načelnik općine Bužim Mersudin Nanić u svom kabinetu primio je Nailu Krupić, članicu Taekwondo kluba “Gazija” iz Bužima koja je postala viceprvakinja svijeta osvojivši srebrnu medalju u kategoriji seniorke -50kg i člana Taekwondo kluba “Hamza” iz Bužima Amela Šahinovića koji je osvojio treće mjesto i brončanu medalju.

– „Prije svega želim vam čestitati na osvojenim medaljama i najboljoj promociji Bužima i Bosne i Hercegovine. Prije osam dana kada smo vas ispratili na Svjetsko prvenstvo ja sam rekao da, a poznavajući naš mentalitet, očekujem pobjede i medalje. Vidim da ste vi to ozbiljno shvatili i u veoma jakoj konkurenciji pokazali

da se možete nositi i sa daleko većim reprezentacijama koje imaju neuporedivo bolje uslove za treniranje i pripreme. Općina Bužim će kao i do sada pomagati sportske kolektive i pojedince, a posebno one koji ostvaruju rezultate na europskim i svjetskim takmičenjima“.- istakao je načelnik Merudin Nanić na prijemu. Pored osvajača medalja prijemu su prisustvovali i predstavnici klubova takmičara, treneri i predsjednik Sportskog saveza općine Bužim, a načelnik Nanić je uručio i novčane nagrade Naili Krupić i Amelu Šahinoviću za ostvarene rezultate na Svjetskom prvenstvu. Iz taekwondo klubova „Hamza“ i „Gazija“ su najavili da nakon kraćeg odmora počinju pripreme takmičara za predstojeće europsko prvenstvo koje će se ove godine održati u Sarajevu. Da uspjeh naših sportista nije ostao nezapažen u regionu najbolje ilustruje najava hrvatske državne reprezentacije koja želi obaviti pripreme za europsko prvenstvo u Bužimu.

## NK VITEZ BUŽIM OSIGURAO 1. MJESTO DVA KOLA PRIJE KRAJA SEZONE



**U**bjedljivom pobjedom NK Vitez proteklog vikenda je dva kola prije kraja prvenstva osigurao titulu prvaka Kantonalne lige i tako se vratio u viši rang – Drugu ligu F BiH Zapad, gdje je igrao 20 godina. Na početku sezone i ispadanja u niži rang, malo ko je vjerovao da

se može nešto napraviti i vratiti klub u viši rang, pogotovo uzimajući u obzir činjenicu da se na nekoliko prvih treninga pojavilo samo nekoliko igrača. Međutim, ponajviše upornošću trenera Edhama Eminića kojem nije bilo teško da traži igrače gdje god je stigao i tako da je uspio sastaviti ekipu sa jasnim ciljem povratak u Drugu Federalnu ligu grupa Zapad. Tokom cijele sezone NK Vitez je uglavnom bio prvi na listi i uporno gradio prednost ka ostvarenju cilja, kojeg je na kraju i postigao.

„Želim da uputim iskrene čestitke svima onima koji su na bilo koji način bili dio ove pozitivne priče kako bi se najstariji bužimski sportski kolektiv NK Viteza vratio u Drugu ligu FBiH. Također, čestitam i stručnom štabu NK Viteza, a zasigurno najviše zasluge nose igrači koji su tokom čitave sezone besprijekorno se borili da vrate klub tamo gdje mu je i mjesto. Nadamo se da će u višem rangu ostvarivati dobre rezultate i ponovo nas obradovati lijepim sportskim vijestima“, stoji u čestitki načelnika općine Bužim Mersudina Nanića.

## MLADI NOGOMETAŠI NK VITEZA POSJETILI NAČELNIKA OPĆINE BUŽIM



**N**ačelnik općine Mersudin Nanić primio je danas u svom kabinetu trenera i mlade nogometaše NK "Vitez" (U-13), koji će početkom juna gostovati u Gracu. Na poziv naših sugrađana koji žive i rade u ovom austrijskom gradu naši nogometaši će odigrati dvije revijalne utakmice sa svojim vršnjacima iz Austrije u sklopu "Turnira prijateljstva" kojeg već tradicionalno organizira džemat "Bošnjak" iz Graca.

"Općina Bužim je uvijek spremna podržati ovakve ak-

tivnosti sportista i sportskih kolektiva koji svoju sredinu predstavljaju i van granica naše zemlje. Vjerujem da će financijska podrška općine olakšati vašim roditeljima ovo putovanje i to me posebno raduje. Želim vam reći da očekujem od vas da se pokažete u najboljem svjetlu na nogometnom terenu i da ponosno predstavljate nogometni klub Vitez i općinu Bužim u R. Auatriji" - naglasio je načelnik općine Mersudin Nanić prilikom obraćanja.

## NAČELNIK NANIĆ PRIMIO ČLANOVE TAEKWON-DO REPREZENTACIJE BIH IZ BUŽIMA



**O**pćinski načelnik Mersudin Nanić primio je članove i predstavnike taekwondo klubova „Fadil Bajrektarević –Gazija“ i „Asim Bajrektarević-Hamza“ koji će predstavljati reprezentaciju Bosne i Hercegovine na Europskom prvenstvu ITF TKD koje se ove godine održava u Sarajevu. Podršku u njihovom odlasku na Europsko prvenstvo pored Općinskog načelnika Mersudina Nanića, dobili su i od Sportskog saveza Općine Bužim i nekoliko sponzora i prijatelja sporta. Predsjednik Sportskog saveza općine Bužim Admir Sijamhodžić posebno je naglasio kako očekuje dobre rezultate od takmičara koji su se pripremali nekoliko mjeseci, te da na Europskom prvenstvu učestvuje preko 30 zemalja i oko 700 takmičara. Iz Bužima na ovom prvenstvu učestvuje osam reprezentativaca, a takmičenje počinje u srijedu. Finalne borbe predviđene su za subotu, a treneri očekuju potvrdu rezultata sa Svjetskog prvenstva i osvajanje medalja.

-„ Uspjesi sa Svjetskog prvenstva su zasigurno rezultat dobrog rada i na ovo prvenstvo idete kao favoriti tako da se očekuju i dobri rezultati. Vjerujem da će članovi reprezentacije BiH na ovom Europskom prvenstvu predstaviti Bužim na najbolji način. Ja Vam želim puno sportske sreće i uspjeha i evo obećavam da će jedan autobus navijača iz Bužima biti u Sarajevu. Vaša je obaveza da postignete dobre rezultate i osigurate finalne borbe“-istakao je načelnik Nanić prilikom obraćanja članovima reprezentacije i predstavnicima klubova.

Europsko prvenstvo održava se od 09.10. do 12.10. u Sarajevu, a članovi reprezentacije iz Bužima odlaze u srijedu za kada je zakazano službeno vaganje svih takmičara. Bosna i Hercegovina će prvi put u historiji biti domaćin Evropskog seniorskog i juniorskog prvenstva u olimpijskim kategorijama, te Evropskog master turnira.

## ODRŽAN PETI PO REDU NAJMASOVNIJI AIRSOFT SUSRET U BIH



Peti međunarodni airsoft susret „Green Forest-5“ u Bužimu je održan u organizaciji kluba ASK „Otpisani“ iz Bužima. Već tradicionalni međunarodni airsoft susret okupio je i ove godine više od dvije stotine airsoftera iz šest zemalja, Njemačke, Poljske, Slovenije, Srbije, Hrvatske i iz Bosne i Hercegovine. Prisutni airsofteri uživali su u 24-satnom susretu u prelijepom krajoliku, te imali priliku osjetiti sve čari ovog vojno-simulacijskog sporta. Susret je svojim kratkim obraćanjem otvorio načelnik općine Bužim Mersudin Nanić, koji je poželio dobrodošlicu svim airsofterima u Bužim, te naglasio da će općina Bužim i dalje davati podršku svemu onome što šalje lijepu sliku Bužima i što ima pozitivne vrijednosti. Inače općina

Bužim je i ove godine bila generalni pokrovitelj susreta „OP Green Forest 5“. Iako je ovaj vojno-simulacijski sport relativno mlad u Bosni i Hercegovini, mladi airsofteri iz Bužima su posljednjih godina postali prepoznatljivi kako u domovini tako i izvan nje i svake godine postavljaju nove granice. Airsoft klub „Otpisani“ iz Bužima osnovan je 2013. godine, a proteklih godina vrijedni članovi kluba uložili su značajna sredstva u realizaciju ideje i radili na popularizaciji airsofta na području Bosne i Hercegovine. Tokom svih godina rada i djelovanja airsoft klub iz Bužima postao je neraskidiva veza između klubova prije svega iz BiH, Hrvatske i Slovenije ali i ostalih zemalja regije.

## JEZERO BRANA BUŽIM PRED EKOLOŠKU KATASTROFU, UGROŽENA I BUŽIMNICA



Jezero Brana Bužim ovih dana ne liči na jezero kojeg smo svi navikli gledati. Naime, zadnjih mjesec-dva ribolovci svakodnevno objavljuju apokaliptične scene sa ove nekad prelijepe lokacije za ribolov i odmor. Rudnik mangana Bužim nemilosrdno crpi enormne količine vode tako da je nivo jezera opao više od dva metra, a svakim danom je više ugrožen i riblji fond u ovom jezeru. Da stvar bude gora više nije riječ samo o jezeru Brana nego i rječici Bužimnica u koju se direktno ulijevaju otpadne vode nakon ispiranja rude. Iako SRD „Šaran“ Bužim posjeduje do-

kumentaciju kojom mu je dato na upravljanje i gazdovanje vodama općine Bužim, a u koje je između ostalog uvršteno i jezero Brana Bužim, niko od nadležnih institucija koje je dodijelilo ribolovno pravo ovom udruženju, i po osnovu kojeg udruženje plaća Kantonalnom ministarstvu poljoprivrede, vodoprivrede i šumarstva naknadu nije došao na poziv da reaguje po pitanju moguće ekološke katastrofe i ugroženosti ribljeg fonda. Općinski načelnik Mersudin Nanić, iako nenadležan u ovoj situaciji odazvao se pozivu Udruženja robilovaca i došao da se uvjeri u trenutno stanje, te na taj način dao podršku udruženju SRD „Šaran“ iz Bužima u prvođenju aktivnosti na zaštiti jezera. U svojoj izjavi pozvao je nadležne institucije da pravovremeno reaguju, te utvrde do koje mjere se voda iz Brane smije ispumpati kako bi se zaštitio riblji fond. Iz udruženja SRD „Šaran“ Bužim naglašavaju da nemaju ništa protiv eksploatacije rude i djelatnosti rudnika mangana Bužim, ali traže da se odredi tačka ispod koje se voda ne bi smjela crpiti, te da se na usisno crijevo na pumpi postavi zaštitna mreža i na taj način zaštititi riblji fond u kojeg je uloženo puno truda i novca. Kad je u pitanju rijeka Bužimnica u koju direktno bez ikakve filtracije idu otpadne vode i koja je nakon ulijevanja istih potpuno crvene boje, takođe traže da se nadležne institucije oglase i traže od rudnika mangana Bužim minimum uvjeta koje moraju ispuniti u svrhu zaštite voda i sprječavanja ekološke katastrofe.

## NAČELNIK OPĆINE BUŽIM UPRIILIČIO PRIJEM ZA SVJETSKOG PRVAKA EDINA VUČELJA



**N**ačelnik Općine Bužim Mersudin Nanić sa saradnicima i predsjednikom Sportskog saveza Općine Bužim Admirom Sijamhodžićem primio je u svom kabinetu Edina Vučelja i predstavnike Taekwon-do klub „Asim Bajrektarević-Hamza“. Na Svjetskom prvenstvu koje je krajem prošlog mjeseca održano u Antaliji, Edin Vučelj je osvojio zlatnu medalju i tako postao svjetski WAKO kickbox prvak.

Vučelj je diplomirao na Muzičkoj akademiji u Sarajevu i danas je ponosni pripadnik Oružanih snaga Bosne i Hercegovine, a na ovom Svjetskom prvenstvu nastupao je za

Taekwon-do klub „Asim Bajrektarević-Hamza“ iz Bužima. „Želim da ti čestitam na ovom izuzetnom uspjehu i poželim u budućnosti još ovakvih vrhunskih rezultata. Moramo se svi zajedno truditi da ovakvih pozitivnih priča iz naše države, a posebno iz našeg Bužima bude što više. Kao i do sada Općina Bužim će podržavati sve sportiste i sportske kolektive u svojim mogućnostima, jer smo itekako svjesni da su oni naši najbolji ambasadori.“-istakao je načelnik Općine Bužim Mersudin Nanić.

Na prijemu je načelnik Općine Bužim uručio i novčanu nagradu kao i predsjednik Sportskog saveza Admir Sijamhodžić koji je posebno naglasio:

„Ova godina će svakako ostati zabilježena u historiji Bužima kao jedna od najplodonojsnijih godina kada su u pitanju borilački sportovi. Kao kruna za završetak ove godine stigla je i ova zlatna medalja Edina Vučelja kojem u ime Sportskog saveza i svoje lično ime čestitam na uspjehu“.

Na kraju se i Edin Vučelj zahvalio Općinskom načelniku, svom matičnom klubu i Sportskom savezu na podršci koju je imao tokom priprema i odlaska na Svjetsko prvenstvo. Posebno je istakao kako samo zajedno i jedinstveno može doći do vrhunskih rezultata, te naglasio da je za ovakav uspjeh ključno razumijevanje, podrška i timski rad, te da će budući rezultati zavisiti isključivo od toga.

## EDIN VUČELJ ZLATNI NA BALKANSKOM KUPU U TEŠNJU



**U**Tešnju je održan Balkanski kup WAKO kickboxinga „Balkan open 2019“ gdje je nastupilo oko 630 takmičara iz 88 država i 15 zemalja.

Takmičari su imali priliku odmjeriti snage u pet WAKO kickboxing disciplina: K1, low kick, kick light, light contact i point fighting. WAKO kickboxing je prošle godine dobio status olimpijskog sporta, a ove godine Svjetsko prvenstvo u tri discipline održava se u oktobru u glavnom gradu Bosne i Hercegovine, dok se drugi dio Svjetskog prvenstva održava u Turskoj.

Priliku za nastup na Svjetskom prvenstvu, ali i status favorita za osvajanje istog, svojim uspjesima i pobjedama

pravi najbolji takmičar BiH u tatami disciplinama Edin Vučelj. Naime, Vučelj je na ovom takmičenju nastupio ispred sportske akademije „Respect“ iz Sarajeva i u dvije discipline do 84kg osvojio zlatnu medalju i pehar za najboljeg borca. Podsjetimo, Vučelj je u februaru mjesecu nastupio na evropskom kupu u Karlovcu gdje se također okitio zlatnom medaljom u veoma jakoj konkurenciji.

„S obzirom da sam se početkom ove godine vratio na borilišta, nakon duge pauze zbog pohađanja oficirske obuke u Oružanim snagama BiH, uspješan ili bolje rečeno stopostotan učinak u dosadašnjem dijelu ovogodišnje kickboxing sezone mi mnogo znači i motiviše me da na predstojećim Svjetskim kupovima pokažem da neću dozvoliti nikome da me porazi na Svjetskom prvenstvu u Sarajevu i da ću kao domaćin postati najbolji na svijetu u ovom novom olimpijskom sportu, a to ću pokušati i u drugoj disciplini mjesec dana kasnije u Turskoj ukoliko budem imao uslove za to. Slušati himnu sa zastavom domovine BiH na pobjedničkom postolju Svjetskog prvenstva za mene je dječjački san kojem se ako Bog da bliži ostvarenje.“ – izjavio je Edin Vučelj oficir OS BiH.

Do kraja polusezone, i početka ljetne pauze, ostaju mu još tri Svjetska kupa koja je već spreman da osvoji ukoliko, kako kaže, bude imao uslove za to, a u prvom planu to je finansijska podrška.

## EKIPA FK KONJODOR POBJEDNIK 1. NOVOGODIŠNJEG TURNIRA U MALOM NOGOMETU „BUŽIM 2018.“



**F**inalnom večeri završen je 1. Novogodišnji malonogometni turnir u Bužimu. Sportska dvorana je bila pretijesna da primi sve one koji su htjeli na djelu vidjeti najbolje hoklere malog fudbala u četiri kategorije i to: dvije kategorije djece U-12 i U-14, te veterana 35+ i seniora.

U sve četiri kategorije turnira, ove godine učešće je uzelo 50 ekipa, što je za svaku pohvalu.

Večer je započela sa finalnom utakmicom u kategoriji U-12, gdje je ekipa NK Krajišnik pobijedila ekipu Vrhovska rezultatom 4:1. Nakon toga su na teren izašli finalisti u kategoriji U-14, gdje su snage odmjerile ekipe NK Krajišnik i NK Vitez. Više nogometnog znanja pokazala je ekipa NK Krajišnik i tako slavila sa ubjedljivim rezultatom od 3:0.

U utakmici za treće mjesto u kategoriji seniora ekipa Okić Transport Velika Kladuša je savladala oslabljenu ekipu MNK Rekreativo sa 2:1. Utakmica za treće mjesto, ili bolje reći za prestiž, donijela je kvalitetan mali fudbal iako je MNK Rekreativo bio oslabljen neigranjem nekolicine standardnih prvotimaca.

Najbolja ekipa u kategoriji veterana je ekipa Galin i Prijatelji, koji su savladali ekipu Termo BiH Bosanska Krupa rezultatom 5:1. Vrhunac večeri bilo je finale u kategoriji

seniora u kojem su se sastale ekipe FK Konjodor i Mehić Ploča. Igrala su se dva poluvremena od 20 minuta u kojima smo gledali utakmicu sa puno lijepih akcija i prilika za postizanje gola. Tako da je u vrlo zanimljivoj i dobroj utakmici pa na trenutke i vrlo žustroj, ekipa FK Konjodor pobijedila rezultatom 5:4 te osvojila naslov 1. Novogodišnjeg malonogometnog turnira „Bužim 2018“.

Ekipa koja je osvojila prvo mjesto u kategoriji seniora za nagradu je dobila 1.000 KM, pehar za prvo mjesto i prelazni pehar, drugo mjesto 400 KM, pehar i treće mjesto 100 KM, pehar. Nagrađivana je i ekipa za fair play. Što se tiče ostale tri kategorije veterana 35+, djece U-12 i U-14 dodijeljeni su i njima pehari za osvojena prva tri mjesta, kao i nagrada fair play i djeci medalje.

Gledaoci su mogli prisustvovati kvalitetnim utakmicama pa čak i nogometnim poslasticama. Vrlo dobro organiziran turnir od strane NK Viteza gledaoci su nagradili odličnom posjetom. Oko 500 gledaoca koji su pratili samo finalnu večer je potvrdila tome, a i pokazatelj da je bužimska publika željna dobrog futsala pa i nogometa uopće.

Nakon finalne utakmice u sve četiri kategoriji dodijeljena su priznanja najboljim pojedincima i najboljim ekipama 1. Novogodišnjeg malonogometnog turnira.

## POTPISAN UGOVOR ZA VANJSKO UTOPLJAVANJE OBJEKTA GDJE JE SMJEŠTEN NK VITEZ BUŽIM



**U**sali općine Bužim potpisan je Ugovor o sufinanciranju vanjskog utopljanja objekta gdje su smještene prostorije kluba NK "Vitez" Bužim. Ugovor su potpisali načelnik općine Bužim Mersudin Nanić i predsjednik kluba NK Vitez Edham Eminić, a vrijednost ugovora je 5.000.00 KM. Zgrada se nalazi u samom centru Bužima, te je dosadašnjim izgledom odudarala od cjelokupnog ambijenta. Zgrada bi sada pored estetskog izgleda trebala biti i utopljena, što će uveliko olakšati funkcionisanje ovog bužimskog kluba.



## POTPISAN UGOVOR: SPORTSKA DVORANA BUŽIM NA UPRAVLJANJE JAVNOJ USTANOVI “CENTAR ZA KULTURU, SPORT I INFORMISANJE” BUŽIM



**U**kabinetu Općinskog načelnika općine Bužim Mersudina Nanića potpisan je Ugovor o upravljanju i korištenju, održavanju i upotrebi objekta “Sportska dvorana Bužim” Ugovor su potpisali načelnik općine Bužim Mersudin Nanić i v.d. direktor JU “Centar za kulturu, sport i informisanje” Bužim Vahidin Veladžić. Potpisivanjem ovog ugovora stvoreni su preduvjeti za bol-

je funkcionisanje Sportske dvorane Bužim. Naime, kao što je poznato dvorana već nekoliko mjeseci funkcionise na način da se o njoj brine Sportski savez Općine Bužim, ali u formalno pravnom smislu riječi ona nije “otvorena” i niko nije odgovoran za nastanak bilo kakve štete na objektu ili opremi. MSS “Hasan Musić” Bužim takođe koristi dvoranu, ali ni za te namjene nije imala s kim potpisati ugovor kojim se definišu prava i obaveze.

S tim u vezi, kako bi mogla sprovesti navedeni ugovor JU “Centar za kulturu, sport i informisanje” Bužim je raspisala javni oglas o prijemu dvojice radnika za ove potrebe.

“Dakle nije riječ o političkom upošljavanju nego prijeko potrebi, i biće izabrani radnici koji budu imali najbolje uvjete shodno zakonskim propisima, Pravilima i Pravilnicima JU “Centar za kulturu, sport i informisanje” Bužim.” navodi v.d. direktor.

Podsjećanja radi i Općinsko vijeće općine Bužim je donijelo Odluku krajem 2018. godine o davanju na upravljanje i korištenje objekta “Sportska dvorana Bužim” Javnoj ustanovi “Centar za kulturu, sport i informisanje” Bužim

## BUŽIM IMA VICEPRVAKINJU SVIJETA I BRONZU



**P**rije nekoliko trenutaka završile su finalne borbe Svjetskog Taekwondo prvenstva u Njemačkoj. Predstavnicima reprezentacije BiH imali su sjajne uspjehe, posebno one koji su ostvarili predstavnici iz Bužima. Naime Naila Krupić, članica Taekwondo kluba “Gazija” iz Bužima postala je viceprvakinja svijeta osvojivši srebrnu medalju u kategoriji seniorke -50kg. S druge strane reprezentativac BiH i član Taekwondo kluba “Hamza” iz Bužima Amel Šahinović osvojio je treće mjesto u kategoriji junior +75kg. Prvi put u historiji sporta općine Bužim isti ima neku od medalja sa svjetskog prvenstva. Nadamo se da će uspjeha biti još, a Naili i Amelu čestitamo na ovom za Bužim velikom učinku.

## BICIKLISTIČKI KLUB BUŽIM NA LUKOMIRU



**P**roteklog vikenda u Sarajevu, tačnije na planini Bjelašnici, održana je bicikljada pod nazivom Sabah Bike. Sabah sa razlogom, jer je prva grupa biciklista krenula u 4:00 ujutru, a druga u 8:00, u čemu se i ogleda specifičnost ove biciklijade.

Start biciklijade je bio Babin do (skijalište) Bjelašnica, gdje su se svi učesnici uputili žičarom na sami vrh planine, te nastavili put prema Lukomiru, koje se nalazi na gotovo 1500 metara nadmorske visine, te zbog toga nosi titulu najvišeg i najizoliranijeg sela u cijeloj zemlji.

Selo Lukomir jedinstveno je po svojim kamenim kućama koje su prekrivene šindrom od trešnjinog drveta. Selu je nemoguće prići, osim na skijama ili pješice već sa dolaskom prvog snijega u decembru, sve negdje do aprila, a ponekad i duže.

## NAKON VIŠEGODIŠNJE PAUZE ODRŽANO OPĆINSKO TAKMIČENJE U RIBOLOVU




**N**a jezeru „Braná“ je u organizaciji udruženja SRD „Šaran“ Bužim održano općinsko kvalifikaciono takmičenje u ulovu ribe na plovak. Ovo je prvo takmičenje organizirano nakon duže pauze i ponovog reaktiviranja udruženja.

Učešće je uzelo 19 takmičara, a takmičenje je sudio sudija ribolovnog saveza BiH Pajzetović Mustafa.

U trosatnom takmičenju najuspješniji je bio Semir Odobašić sa osvojenih 2460 bodova, zatim drugi Almedin Porić sa 2385 bodova, trećeplasirani Safet Bajrektarević sa 2210 bodova i četvrtoplasirani Omer Skenderović sa 2185 bodova.

### ODRŽAN VITEŠKI TURNIR U STRELJAŠTVU



**U** sklopu manifestacije Slobodarski dani Viteškog grada Bužima, održan je tradicionalni Viteški turnir u streljaštvu.

Organizator kao i ranijih godina bio je Streljački klub „OMLADINAC“ Bužim, a takmičenje je održano u streljani kluba koja se nalazi u skopu Lovackog doma „Meho Bašić“.

Prigodnim obraćanjem turnir je otvorio načelnik općine Bužim Mersudin Nanić.

U takmičarskom dijelu učešće je uzelo 35 takmičara – streljaca, od kojih su najuspješniji bili:

va. Prvak staze ali van konkurencije je bio Hadžić Rasim sa osvojenih 3720 bodova.

Trojica prvorangiranih su se plasirali na viši nivo takmičenja. Istima su uručene nagrade i priznanja, a najzaslužnijima za reorganizaciju udruženja i organizaciju takmičenja zahvalnice.

Posebnu Zahvalnicu Udruženja dobio je Općinski načelnik općine Bužim Mersudin Nanić, takođe za pomoć udruženju.

Nakon dodjele priznanja organizovano je druženje i zakuska uz paprikaš.

1. mjesto – Semir Odobašić sa 70 krugova
2. mjesto – Selmir Ljubijankić sa 68 krugova
3. mjesto – Ramo Jusić sa 62 kruga.

Nakon turnira uručena su Priznanja najuspješnijim takmičarima, Zahvalnica za organizaciju turnira Huseinu Velagiću, najmlađem takmičaru Amaru Karajiću i najstarijem Safetu Bajrektareviću.

Predsjednik streljačkog kluba „OMLADINAC“ Nevsad Jusić, zahvalio se svim takmičarima na učešću i činjenici što i na ovaj način čuvaju spomen na sve Bužimske vitezove.

## BUŽIMLJANIN EDIN VUČELJ OSVOJIO ZLATO NA SVJETSKOM PRVENSTVU U KICKBOXINGU U TURSKOJ



U moru negativnih vijesti, iz Antalije u Turskoj stiže lijepa informacija. Bužimljanin, Edin Vučelj, reprezentativac BiH u kickboxingu, osvojio je zlato. Nakon pobjede protiv Grčke 3:0, a onda i Novog Zelanda 3:0 pobijedio sam u jako teškoj borbi Makedonca 2:1 i tako postao SVJETSKI PRVAK U WAKO KICKBOXINGU. OSVOJIO SAM ZLATO ZA BOSNU I HERCEGOVINU, ZA KRAJINU I BUŽIM, ZA SANDŽAK, ZA OS BiH, ZA SVE ONE KOJIMA TO NEŠTO ZNAČI! Uz to

sam ostao dominantno prvi na svjetskoj rank ljestvici!, napisao je Vučelj na Facebook-u. Definitivno najzaslužniji čovjek za moj sportski uspjeh.. Trener slovenske kickboxing reprezentacije i trener u fight klubu Gepard iz Ljubljane zbog čijeg sam ulaganja i motivisanja izgradio ovo do sada.. Obukao je naš dres i vodio me kroz sve borbe do konačnog osvajanja svjetske titule! Višestruki Svjetski i Evropski šampion Sanel Ljutić! Hvala coach!

## NS USK: NK VITEZ NAJBOLJA EKIPA U PROTEKLOJ GODINI, EDHAM EMINIĆ NAJBOLJI TRENER U SVIM KATEGORIJAMA



U organizaciji Nogometnog saveza USK, u Kulturnom centru Bihać održan je izbor najboljih nogometaša, nogometašica i nogometnih ekipa USK.

Manifestacija je otvorena obraćanjem predsjednika Sportskog saveza USK Emira Dautovića, a kulturno-zabavni program upotpunili su Plesni klub Žute dunje, Preporod i Umjetnička škola Bihać. U kategoriji Perspektivnih pionira uručeno je četrdeset i dva priznanja, a također su proglašeni i najbolji pojedinci u istoj kategoriji. I u kategoriji perspektivnih pionira treće mjesto je podijeljeno na dva osvajača, a to su Amil Jakupović iz NK Rudar i Emrah Mehić iz NK Vitez Bužim. Alen Omeragić iz NK Krajišnik je osvojio drugu poziciju, dok je prvu poziciju osvoji pionir Asim Skalić OFK Bihać. Generalni sekretar NS USK-a, Mirza Kazlagić i Dopredsjednik NS USK-a, Emir Begić uručili su priznanja najboljim u kategoriji Seniori-Futsal, a najbolji strijelac Kantonalne lige USK-a je Edis Nuhanović NK Vitez Bužim. Edaham Eminić je najbolji trener u svim kategorijama, a nagrada mu je uručena od strane Dopredsjednika NS USK-a, Emira Begića i Predsjednika sportskog saveza USK-a, Emira Dautovića. Najbolje ekipe u kategoriji seniorki su ŽFNK Sana 2014 i ŽNK Željezničar 2011, dok su u kategoriji Futsala najbolje dvije ekipe MNK Bubamara i FK Konjodor. Najbolja ekipa u kategoriji seniora je NK Vitez iz Bužima sa osvojenim prvim mjestom u Kantonalnoj ligi NS USK-a i plasmanom u viši rang takmičenja.

## OBILJEŽENA GODIŠNJICA FORMIRANJA GLAVNOG KRIZNOG ŠTABA



Obilježena 27. godišnjica od formiranja Glavnog kriznog štaba i štaba Teritorijalne odbrane Bužim, te 26. godišnjica od prijema ratne zastave 105. Bužimske udarne muslimanske brigade. Kako i priliči, obilježavanje je otpočelo posjetom Turbetu generala Izeta Nanića i šehida 505. Viteške bužimske brigade gdje je proučena Fatiha, a nakon toga je održana javna tribina u Velikoj sali JU "Centar za kulturu, sport i informisanje" Bužim. O osnivanju glavnog kriznog štaba za bužimsko

područje kao i o formiranju jedinica Teritorijalne odbrane, jedinica Civilne zaštite, pomoćnih kriznih štabova i vojne policije, govorio je Zijad Nanić. O prijemu ratne zastave 105. Bužimske udarne muslimanske brigade koja se desila 04.04.1993. godine govorio je Fuad Kulauzović. Nakon njegovog izlaganja prisutni su imali priliku pogledati kratkometražni dokumentarni film o prijemu ratne zastave 105. Bužimskoj udarnoj muslimanskoj brigadi, kao i govor Brigadnog Generala rahmetli Izeta Nanića. Koliko je ovaj datum značajan dovoljno govori činjenica da je General Izet Nanić upravo na ovaj dan primio ratnu zastavu 105. Bužimske udarne muslimanske brigade od komandanta 5.Korpusa Ramiza Drekovića. Na kraju programa prisutnima se obratio i Općinski načelnik Mersudin Nanić, koji je uputio čestitku, te kazao da će Općina Bužim i u narednom periodu nastaviti podržavati i obilježavati sve značajne datume iz proteklog rata, a u cilju da se nikada ne zaborave ratna dešavanja i naši vitezovi.

"Četvrti april za sve Bužimljanke i Bužimljane treba da je jako važan datum i u narednim godinama treba ga obilježavati na još većem nivou, jer on to zaista i zaslužuje".-

## U BUŽIMU OBILJEŽEN 15.APRIL – DAN FORMIRANJA ARMIJE R BiH



Nizom prigodnih sadržaja na području Unsko-sanskog kantona obilježava se dvadeset i sedma godišnjica od formiranja Armije Republike Bosne i Hercegovine. Ovogodišnje obilježavanje započeto je malonogometnim turnirom koji je održan 10. aprila u dvorani Luke u Bihaću. Zatim je 11. aprila II Rendžerski puk Oružanih snaga BiH organizirao Dan otvorenih vrata, gdje su svi prisutni u kasarni „Adil Bešić“, upoznati sa aktivnostima pripadnika Oružanih snaga. Istog dana u večernjim satima emitovana je emisija „U FOKUSU“, posvećena godišnjica formiranja Armije RBiH. Programom obilježavanja 27. godišnjice formiranja Armije RBiH predviđeno je 12. aprila i polaganje cvijeća u svim Općinama Unsko-sanskog kantona. Tako je u sklopu ovogodišnjeg programa u

Bužimu općinski načelnik Mersudin Nanić upriličio prijem u sali Općine Bužim za ministra za boračka pitanja i RVI u Vladi Unsko-sanskog kantona, predstavnike Koordinacije boračkih udruženja Općine Bužim, pripadnike policijskih snaga, predstavnike BIZ-a Bužim, te predstavnike političkog i javnog života Općine Bužim. Uz upućene čestitke svim pripadnicima Armije RBiH, konstatovano je da se u Bužimu uvijek držalo do obilježavanja značajnih datuma iz odbrambeno-oslobodilačkog rata 1992-1995. godine na poseban i jedinstven način. Nije se razgovaralo o otvorenim pitanjima i problematici boračkih kategorija ali je naglašeno kako će Općina u saradnji sa nadležnim kantonalnim ministarstvom realizirati projekte kao što su izgradnja Muzeja grada, obilježavanje značajnih datuma i održavanje i izgradnja spomen obilježja. Nakon prijema delegacija se uputila na Turbe generala Izeta Nanića i šehida 505. viteške brigade gdje je proučena Fatiha svim palim borcima i šehidima Armije RBiH koji su dali ono najvrijednije za slobodu koju danas svi uživamo. Obilježavanje ovog značajnog datuma završava se u ponedjeljak 15. aprila svečanom akademijom koja će se održati u sali Kulturnog centra Bihać sa početkom u 19,00 sati. Podsjetimo, Armija Republike Bosne i Hercegovine službeno je osnovana 15. aprila 1992.godine, od jedinica Teritorijalne obrane BiH i organiziranih dobrovoljaca, kao odgovor na srpsku agresiju na Republiku Bosnu i Hercegovinu. Nosioci svih aktivnosti 27. godišnjice formiranja Armije RBiH su Savez branilaca, Ministarstvo za pitanje boraca USK-a i Oružane snage BiH.

## ODRŽANA OPĆINSKA SMOTRA SPOSOBNOSTI, ZNANJA, STVARALAŠTVA I SPORTA OSNOVNIH ŠKOLA



**N**a ovogodišnjoj Općinskoj smotri sposobnosti, znanja, stvaralaštva i sporta učenika Osnovnih škola općine Bužim, podijeljene su diplome i priznanja najuspješnijim učenicima i njihovim nastavnicima na školskim takmičenjima iz oblasti školskih predmeta i sporta, za školsku 2018/2019. godinu. Domaćin manifestacije ove godine bila je Osnovna škola „Mirsad Salkić-Džaja“ Čava. Manifestaciju je uvećao i općinski načelnik Mersudin Nanić, koji je tom prilikom kazao da mu je izuzetna čast što može prisustvovati ovakvim manifestacijama.

„Posebno me raduje što su ovdje i moji nastavnici i mentori, koji su mene učili za vrijeme mog školovanja. Općina Bužim podržava obrazovanje i ovu manifestaciju smotre znanja i umijeća. Obrazovana i odgojena djeca su budućnost naše Općine, a svakako i naše države BiH. Upućujem iskrenu čestitku svim učenicima i nastavnicima koji su bili učesnici ovogodišnje Općinske smotre, te im pritom želim mnogo uspjeha u radu u idućoj školskoj godini.“ Na manifestaciji je priređen i kulturno-zabavni dio programa u kojem su učenici naših škola zabavljali prisutne goste plesnim, folklornim i vokalnim umijećima.

## U BUŽIMU ODRŽAN FESTIVAL RADA TEHNIČKIH I STRUČNIH ŠKOLA F BiH



**B**užim je bio domaćin Festivala rada srednjih tehničkih i stručnih škola kojeg organizira Udruženje nastavnika i saradnika srednjih tehničkih škola Federacije BiH. Domaćini ove manifestacije, Mješovita srednja škola “Hasan Musić” i Općina Bužim ugostili su osam stotina takmičara i oko tri stotine mentora-nastavnika. Tradicionalno takmičenje srednjih tehničkih i stručnih škola održava se jedanaesti put u našoj zemlji i učenici se takmiče u četiri discipline. Na festivalu rada predstavile su se škole iz trideset i četiri grada iz cijele Bosne i Hercegovine, a na kraju takmičenja najboljima su dodijeljene nagrade i

priznanja. Prije početka takmičarskog dijela 11. Festivala rada u ime domaćina i organizatora prisutne je pozdravio direktor Mješovite srednje škole “Hasan Musić” Ibrahim Grošić. Načelnik Općine Bužim Mersudin Nanić poželio je svim učesnicima festivala dobrodošlicu u grad Bužim sa željom da sa ovog takmičenja ponesu najbolje utiske iz Krajine i Bužima. Ministar obrazovanja, nauke kulture i sporta u Vladi USK-a Damir Omerdić uputio je čestitke organizatoru i svečano otvorio 11. Festival rada srednjih tehničkih i stručnih škola Federacije BiH..

## U BUŽIMU OBILJEŽEN DAN POLICIJE USK



**S**utra se obilježava Dan policije Unsko-sanskog kantona, a centralna manifestacija ove godine održaće se u Bosanskom Petrovcu. Prije dvadeset i dvije godine us-

postavljanjem Unsko-sanskog kantona formirano je Ministarstvo unutrašnjih poslova. Tim povodom već nekoliko dana pripadnici MUP-a USK provode brojne aktivnosti. U Bužimu je povodom Dana policije u Policijskoj stanici Bužim, komandir Mehmed Kišmetović, upriličio prijem za načelnika Općine Bužim Mersudina Nanića sa saradnicima, a prijemu je prisustvovao i zastupnik u Skupštini USK Nisvet Jusić. Načelnik Nanić čestitao je svim pripadnicima policije Unsko-sanskog kantona Dan policije. Posebno je naglasio da će općinska uprava uraditi sve iz svoje nadležnosti da se u što skorijem roku krene sa realizacijom izgradnje zgrade policije u Bužimu, što je dijelom i bila tema prijema. Nakon prijema na turbetu generala Izeta Nanića i šehida 505. viteške, učenjem Fatihe i polaganjem cvijeća odata je dužna počast poginulim pripadnicima Ministarstva unutrašnjih poslova i 505. Viteške brigade.

## OBILJEŽENA GODIŠNJICA PRVOG NAPADA NA BUŽIM 11.06.1992.



**U** organizaciji Organizacionog odbora za obilježavanje značajnih datuma iz odbrambeno-oslobodilačkog rata 1992-1995. obilježena je godišnjica od prvog napada na Bužim. 11. juna ratne 1992. godine na Bajram agresorske snage sa teritorija R Hrvatske izvršile su

napad u širem reonu MZ Bučevci i MZ Stabandža. Ovogodišnji program obilježavanja prvog napada na Bužim započeo je polaganjem cvijeća i učenjem Fatihe na turbetu Generala Izeta Nanića i poginulih pripadnika 505. Viteške brigade. U džamiji na Bučevcima nakon ikindije namaza proučen je Jasin i tevhid borcima-šehidima 505. Viteške brigade Armije R BiH, nakon kojeg je na poprištu prve oružane bitke održan historijski sat na kojem su govorili učesnici ovih događaja. Ratnim veteranima se kratko obratio načelnik općine Bužim Mersudin Nanić, koji je naglasio da će općina Bužim i u buduće biti na raspolaganju organizacionom odboru kako bi se ovaj ali i ostali bitni datumi iz proteklog rata obilježavali i otrgli od zaborava, te da se mora prenositi na mlade generacije trajno sjećanje na herojsku borbu kako bi je otrgli od zaborava. Predsjednik organizacionog odbora za obilježavanje značajnih datuma iz odbrambeno-oslobodilačkog rata 1992-1995. svojim obraćanjem najavio je učesnike ove bitke a o njoj su govorili Nijaz Miljković i Agan Elkasović.

## SVEČANA DODJELA DIPLOMA MATURANTIMA MSŠ "HASAN MUSIĆ" BUŽIM



**U**Bužimu je u povodu završetka školske 2018/2019. godine izvršena svečana dodjela diploma maturantima MSŠ „Hasan Musić“ Bužim. Svečanosti su pored maturanata prisustvovali roditelji i profesori kao i Općinski načelnik Općine Bužim sa saradnicima. Prisutnima se obratio direktor MSŠ „Hasan Musić“, koji je uputio čestitke maturantima te apelirao roditeljima da upisuju i nove generacije u ovu obrazovnu ustanovu kako bi ista imala budućnost. Načelnik općine Bužim Mersudin Nanić u svom obraćanju je govorio o bitnosti obrazovanja u današnje vrijeme, čestitao svim maturantima te im poželio sreću u daljem školovanju i životu.

## U BUŽIMU ODRŽAN PERFORMANS 8.372



**U** Bužimu predstavljen „Performans 8.372“ u spomen na sve žrtve genocida koji se dogodio 11. jula 1995. godine u Srebrenici. Performans su organizirali prijatelji, članovi porodice r. Dedić Mehruđina ispred Muzeja 5. Korpusa i članovi Udruženja „Nanićevi Bužimljani“. Zanimljivu postavku performansa 8372 ispred Centra za kulturu, sport i informisanje tokom cijelog dana posjetili su brojni Bužimljani, predstavnici boračkih organizacija, a u prijepodnevnom satima i načelnik općine Mersudin Nanić je svojim prisustvom podržao ovaj događaj i upisom u knjigu utisaka odao dužnu počast osnivaču i

idejnom tvorcu Muzeja 5. Korpusa Mehruđinu Dediću. „Želja r. Mehruđina Dedića da ovaj performans posvećen nevino ubijenim Srebreničanima obiđe sve gradove Unsko-sanskog kantona se ispunjava zahvaljujući porodici, prijateljima i Udruženjima koja baštine odbrambeno-oslobodilačku borbu boraca 5. Korpusa Armije R BiH. Danas možemo biti ponosni što imamo priliku da u Bužimu, na 11. juli odamo počast svim ubijenim Srebreničanima i tako još jednom podsjetimo sve na genocid koji se dogodio jula 1995. godine“ naglasio je načelnik općine Bužim Mersudin Nanić.

## POSTAVLJEN JARBOL I PODIGNUTA VELIKA ZASTAVA IZNAD BUŽIMA U SUSRET SLOBODARSKIM DANIMA



**N**a starom gradu Bužim se zavijorila velika zastava Bosne i Hercegovine u susret velikoj manifestaciji Slobodarski dani viteškog grada Bužima. Zastava je dimenzija 3,5 x 7 metara a visina jarbola 14. Postavljanju jarbola i zastave prisustvovao je i načelnik općine Bužim Mersudin Nanić koji je tom prilikom izjavio: “Podižemo danas zastavu naše domovine Bosne i Hercegovine iznad našeg viteškog grada Bužima u ime svih šehida, ratnih vojni invalida, demobilisanih boraca i patritota 505. viteške brigade, a sve u znak slobode koju danas uživamo.

Ovo je samo mali znak i poruka svima koji udaraju na temelje naše domovine da mi u Bužimu volimo svoju domovinu i da smo opredjeljeni da čuvamo i očuvamo svoje vrijednosti.

Iskreno se nadam da će se zastava naše domovine vioriti iznad Bužima sve do Sudnjeg dana i da ćemo svi živjeti u miru i slobodi i zajednički graditi naš Bužim. Slobodarski dani mogu da počnu.”

Inače planirano je da sutra bude i svečani otvor i dizanje zasatave.

## OTVORENA MANIFESTACIJA SLOBODRASKI DANI VITEŠKOG GRADA BUŽIMA



**S**lobodarski dani viteškog grada Bužima, manifestacija koja se već dvadeset i četiri godine obilježava u našem gradu, započela je sinoć prigodnim aktivnostima i svečanostima. Kao i ranijih godina, manifestacija je započela svečanim prijemom u Islamskom kulturnom centru Bužim, te posjetom Muzej sobi 505. Vbbr i turbetu generala Izeta Nanića i poginulim borcima 505. Viteške brigade gdje je proučena fatiha i Jašin. Nakon toga na platou Osnovne škole "Bužim" održano je, 19.-to po redu, tradicionalno Večer Kur'ana u organizaciji Medžlisa Islamske zajednice Bužim, a na koje svake godine okuplja eminentne učeće Kur'ana iz BiH i regije. 24. manifestaciju "Slobodarski dani viteškog grada Bužima" otvorio je načelnik općine Bužim, Mersudin Nanić, koji koji je u svom obraćanju, između ostalog naglasio:

„Manifestacija "Slobodarski dani viteškog grada Buži-

ma" koja se obilježava svake godine od 4. do 15. augusta, jeste kontinuitet našeg pamćenja iz naše bliže historijske prošlosti na agresiju koju smo doživjeli u periodu 92-95. Ovo je manifestacija u kojoj su nam pomiješani osjećaji slave, herojske borbe, viteške pobjede, slobode i tuge boli za našim šehidima i generalom Izetom Nanićem. U protekloj agresiji mi nismo bili samo žrtve, mi smo i pobjednici, jer naš opstanak je ustvari naša pobjeda. Naša obaveza je da generacije koje dolaze budu odgajane na istini žrtve i na istini pobjede. Zato su nam potrebne ovakve manifestacije i ovakva okupljanja. Mi svoju manifestaciju već 19. godina počinjemo Božijom riječju i to je nešto specifično za ovakva obilježavanja. Ja koristim priliku da čestitam MIZ Bužim na organizaciji kao i Organizacionom odboru na ovogodišnjoj organizaciji manifestacije. Danas smo podigli zastavu naše domovine Bosne i Hercegovine iznad našeg viteškog grada Bužima u ime svih šehida, ratnih vojni invalida, demobilisanih boraca 505. viteške brigade, a sve u znak slobode koju danas uživamo. Ovo je samo mali znak i poruka svima koji udaraju na temelje naše domovine da mi u Bužimu volimo svoju domovinu i da smo opredjeljeni da čuvamo i očuvamo svoje vrijednosti. Iskreno se nadam da će se zastava naše domovine vioriti iznad Bužima sve do Sudnjeg dana i da ćemo svi živjeti u miru i slobodi i zajednički graditi naš Bužim. Stoga neka nam opći interesi budu iznad ličnih, budimo jedni za druge a ne jedni protiv drugih. U to ime 24. manifestaciju Slobodarski dani viteškog grada Bužima proglašavam otvorenima“.

Na otvaranju ovogodišnje manifestacije "Slobodarski dani

## NA ĆORKOVAČI OBILJEŽENA GODIŠNJICA POGIBIJE GENERALA IZETA NANIĆA



**C**entralni dio manifestacije "Slobodarski dani viteški grada Bužima" preselio se na Ćorkovaču gdje je nekoliko hiljada građana Bužima, mnogobrojnih gostiju i zvanica obilježilo dvadeset i četvrtu godišnjicu od pogibije generala Izeta Nanića. Manifestacija je započela pješačkim pohodom kojeg tradicionalno organizira Udruženje mladih Bužim, a na ovogodišnjem pohodu "Putem bužimskih vitezova" učestvovalo više od 800 učesnika iz svih dijelova Bosne i Hercegovine. Porodica komandanta Nanića uz del-

egacije federalnih, kantonalnih i općinskih vlasti, boračkih organizacija i Islamske zajednice u BiH, posjetila su mjesto pogibije generala Izeta Nanića i pomoćnika komandanta za obavještajne poslove Mehe Bašića na Vijencu u Hrvatskoj, gdje je proučena Fatiha i položeno cvijeće. Na mjestu pogibije komandanta Nanića održan je kratki istorijski čas, a o događajima i borbama tog 5. augusta govorio je Agan Elkasović. Nakon što su učesnici pješačkog marša stigli su na lokalitet Ćorkovače održan je historijski sat i tevhid, a na kraju prisutnima su se obratili muftija bihački Mehmed ef. Kudić, ministar za pitanja boraca u Vladi USK-a Ermin Zulić i načelnik Općine Bužim Mersudin Nanić.

"U Bužimu i Unsko sanskom kantonu su pomiješani osjećaji. S jedne strane neizmjerena tuga što obilježavamo godišnjicu pogibije našeg komandanta, a s druge strane ponos na sve bužimске vitezove i uspjehe 505. viteške brigade i Petoga korpusa Armije RBiH jer su prije dvadeset i četiri godine oslobodili privremeno okupiranu teritoriju Bosne i Hercegovine i deblokirali kanton. Ovo Spomen obilježje ponosa i pobjeda će svakako biti podsjetnik svim budućim generacijama da herojska borba naših najboljih sinova nikada neće biti zaboravljena", kazao je između ostalog načelnik općine Bužim Mersudin Nanić.



## U BUŽIMU OBILJEŽENA GODIŠNJICA FORMIRANJA 5.KORPUSA



**U** Bužimu je obilježena dvadeset i sedma godišnjica od osnivanja 5. Korpusa Armije RBiH. Nakon prijema kod načelnika Općine Bužim Mersudina Nanića, delegacija Koordinacije boračkih udruženja iz Bužima i USK-a, starješine 5.Korpusa i Oružanih snaga BiH, te predstavnici Skupštine i Vlade USK-a posjetili su turbe Generala Izeta Nanića gdje je položeno cvijeće i pručena Fatiha. Program obilježavanja godišnjice osnivanja 5.Korpusa nastavlja se i u svim gradovima Unsko-sanskog kantona, a završava se u ponedjeljak otvaranjem Spomen sobe 5.Korpusa i svečanom akademijom koja se ove godine

održava u Bosanskoj Krupi. 5. Korpus Armije RBiH osnovan je 21.10.1992. godine u Bihaću. Bio je djelo krajiških patriota i do kraja rata ostao multietnički. U svom oslobodilačkom pohodu 1995.godine oslobodio je 6 bh gradova. U vrijeme formiranja imao je 10.152 borca, a do kraja rata taj broj je povećan na blizu 20.000 boraca. Borio se protiv tri neprijatelja – vojske srpske Krajine, vojske RS i tzv. AP ZB osuđenog ratnog zločinca Fikreta Abdića. Sjedište korpusa grad Bihać bio je u neprijateljskom obruču 1.201 dan kao i svi drugi gradovi na tadašnjem Okrugu Bihać.

## SVEČANOM AKADEMIJOM OBILJEŽEN DAN DRŽAVNOSTI BIH



**O**državanjem Svečane akademije u povodu Dana državnosti BiH, te kulturno-zabavnim programom u prepunoj Velikoj sali JU “Centar za kulturu, sport i informisanje” Bužim, obilježen je 25. novembar, Dan državnosti Bosne i Hercegovine. Organizatori ovogodišnjeg obilježavanja bili su Općina Bužim i JU “Centar za kulturu, sport i informisanje zajedno sa odgojno-obrazovnim ustanovama, te kulturno umjetničkim društvom

“Sevdah” iz Bužima čiji su učenici i članovi izveli bogat kulturno-zabavni program. Obilježavanje je počelo intoniranjem himne BiH te referatom o Danu državnosti BiH kojeg je pročitao uvodničar Sead Emrić. Akademiji su prisustvovali predstavnici političkog, društvenog i vjerskog života Općine Bužim te mnogobrojni građani koji su svojim prisustvom još jednom dokazali da datumi značajni za opstojnost države ne smiju i ne mogu biti zaboravljeni. Nakon intoniranja himne i prigodnog referata prisutnima se obratio i čestitku uputio Općinski načelnik Općine Bužim Mersudin Nanić koji je između ostalog kazao da trenutno uređenje naše države možda nije onakvo kakvim bi ga željeli, ali ipak imamo svoju državu za koju su mnogi dali živote, ostavili je u emanet, te nam je obaveza da je čuvamo i pravimo bolji ambijent za buduća pokoljenja, na kraju obraćanja je svim građankama i građanima općine Bužim, te svima koji državu BiH smatraju svojom domovinom čestitao Dan državnosti. Svojim izvedbama, učenici MSŠ “Hasan Musić”, osnovnih škola: “Bužim”, “Suljo Mirvić”, mališani JU “Dječiji vrtić” Bužim i KUD “Sevdah” Bužim obogatili su ovaj program i pokazali kako se gaji patriotizam prema svojoj domovini.

## JEDINSTVEN DOČEK MJESECA RAMAZANA U BUŽIMU



**U**Buzimu je ovim povodom bilo u znaku djece i posebnog gosta, mjeseca Ramazana. Velika sala JU „Centar za kulturu, sport i informisanje“ Bužim bila je mala da primi sve posjetioce.

Naime, u organizaciji Aktiva žena Medžlisa IZ Bužim, organizovan je doček mjeseca Ramazana na poseban način. Bužimski mališani kojih je bilo oko 400 dobili su ramazanski paketić i ramazansku vaktiju. Nakon toga dobili su i balone punjene helijem, na koje su kačili svoje ramazanske poruke, i zajedno ih pustili u zrak. Da bi kompletna priča imala tradicionalne okvire, kolonu djece je predvodio glasnik sa tradicionalnim „talambazom“ po uzoru na davna vremena u kojima su se sehuri i iftari na ovim prostorima oglašavali upravo na ovakav način.

Prisutnoj djeci i roditeljima se obratio Glavni imam Medžlisa IZ Bužim Mehmed ef. Harčević i koordinatorica Odjela za brak i porodicu Alma Šahinović.

Iako je bilo kišovito vrijeme, ugođaj je bio potpun a djeca su u glas pjevali kasidu „Ramazan“.

Najmlađi Bužimljani i Bužimljanke su na ovaj način pokazali odraslima da Ramazan u Bužimu treba da bude poseban gost kao što je uvijek i bio.

viteškog grada Bužima proglašavam otvorenima“.

Na otvaranju ovogodišnje manifestacije “Slobodarski dani viteškog grada Bužima” prisutnima se obratio i izaslanik reisu-l-uleme muftija banjalučki Nusret ef. Abdibegović, te muftija bihački Mehmed ef. Kudić. Prijemu i otvoru manifestacije prisustvovali su predstavnici izvršne i zakonodavne vlasti sa područja općine Bužim i Unsko-Sanskog kantona, te predstavnici boračkih organizacija i udruženja. Ova, po mnogo čemu, posebna manifestacija na cijeloj teritoriji BiH svake godine napreduje i sadržaji su prilagođeni svim uzrastima.

## OBILJEŽEN DAN OŠ “BUŽIM”, HANA ALDŽIĆ PROGLAŠENA UČENICOM GENERACIJE



**U**povodu 20. maja – Dana OŠ „Bužim“ u prostorijama škole upriličen je prigodan program kojim je obilježen ovaj značajan datum.

Bila je to prilika da se uruče priznanja najuspješnijim učenicima i nastavnicima, svima onima koji su na školskim takmičenjima osvojili neko od prva tri mjesta i plasirali se na općinska takmičenja.

Ovom prilikom proglašen je učenik generacije za ovu školsku godinu a to je Hana Aldžić, učenica IX-2 Područne škole Varoška Rijeka.

Program su upotpunili učenici ove škole raznim koreografijama i performansima, a Dan škole je prigodnim obraćanjem čestitao prisutnima Adnan Nuhić, direktor OŠ “Bužim”

## UDRUŽENJE DISTROFIČARA BUŽIM OBILJEŽILO “NEDJELJU BORBE PROTIV DISTROFIJE”



U periodu 28.04.-31.05.2019. godine, Udruženje distrofičara Bužim je nizom aktivnosti organizovalo obilježavanje “Nedjelje borbe protiv distrofije” u Bužimu. Ovo je međunarodna manifestacija koja se tradicionalno obilježava u većini zemalja svijeta tokom mjeseca maja, a ima za cilj da skrene pažnju šire javnosti o ovoj bolesti i na sve probleme sa kojim se ova populacija susreće, ali i da ukaže na mogućnosti ovih lica. Prva aktivnost u sklopu programa ovogodišnjeg obilježavanja “Nedjelje borbe protiv distrofije” je bilo učešće članova udruženja na 19. – tim međunarodnim tradicionalnim sportskim igrama osoba sa invaliditetom grada Cazina, koje su održane 28.04.2019. godine u Cazinu. Na ovim igrama, članovi ovog udruženja su ostvarili izuzetno dobre rezultate, gdje su osvojili ukupno četiri medalje. Druga aktivnost je bila

organizacija velikog druženja članova i prijatelja udruženja u Bužimu, te izlet članova udruženja na bužimsko izletišće “Svetinja”. Šahovska sekcija je uzela učešće na otvorenom šahovskom prvenstvu grada Siska. Zadnja aktivnost u sklopu ovogodišnje manifestacije obilježavanja “Nedjelje borbe protiv distrofije” u Bužimu je bila organizacija Iftara za članove i prijatelje udruženja. Kroz sve aktivnosti koje su ove godine realizovali, bilo je uključeno preko stotinu lica, čime se još jednom potvrdilo da su ove aktivnosti uvijek dobro prihvaćene od strane članova udruženja.

“Posebno nam je zadovoljstvo što smo jedina organizacija sa područja USK-a koja svake godine u mjesecu maju obilježi ovu značajnu manifestaciju, a sa ovom praksom ćemo u budućnosti nastaviti.” naveli su iz Udruženja Distrofičara općine Bužim.

## NIZOM SADRŽAJA OBILJEŽEN RAMAZANSKI BAJRAM U BUŽIMU



U Bužimu je Ramazanski Bajram obilježen nizom aktivnosti i sadržaja. Tako je prvog dana nakon bajramskog prijema održan prigodan program i Bajramski koncert u organizaciji MIZ Bužim, općine Bužim i JU „Centar za kulturu, sport i informisanje“ Bužim. Publici prepune velike sale JU „Centar za kulturu, sport i informisanje“ Bužim predstavili su se bužimski mališani JU „Dječiji vrtić“ Bužim, zatim osnovne škole Bužim, Čava i Konjodor, Ženski gradski hor Bužim i Hor Gazija Bužim.

Na početku programa, Bajramske poruke i čestitke su uputili glavni imam MIZ Bužim Mehmed ef. Harčević i načelnik općine Bužim Mersudin Nanić.

U toku programa je izvršena i podjela bajramskih paketića za najmlađe učesnike, te čokolada za svu prisutnu djecu koje su pripremile vrijedne članice Aktiva žena MIZ Bužim, a večer je završeno promocijom knjiga i izložbom autora Džeke Bibuljice.

## PRIGODNIM PROGRAMOM OBILJEŽEN DOLAZAK 1441. HIDŽRETSKE GODINE



U organizaciji Medžlisa Islamske zajednice Bužim i Općine Bužim u Gradskoj džamiji Bužim sinoć je poslije akšam-namaza prigodnim programom obilježena Nova 1441. hidžretska godina.

Prisutnima su se obratili Senad ef. Aljić, imam gradske džamije u Bužimu, i Mehmed ef. Harčević, Glavni imam bužimski.

U ime općine Bužim i u svoje ime vjernicima je uputio čestitku i načelnik općine Bužim Mersudin Nanić:

„Svim muslimanima i muslimankama u domovini i dijaspori u ime Organa uprave Općine Bužim i svoje lično ime upućujem najiskrenije čestitke, sa željom da nam nastupajuća Nova hidžretska godina donese blagostanje, radost,

napredak, zdravlje i više uzajamnog poštivanja i uvažavanja, te da svi budemo još bolji ljudi, da napredujemo na svim poljima i na taj način gradimo naš Bužim za dobrobit svih nas i naše djece.“

Prigodan Vaz održao je hafiz Mehmed ef. Kudić, muftija bihački, dok su Mevlud izveli imami Medžlisa Islamske zajednice Bužim.

Arapska riječ “hidžra” znači iseljenje Poslanika Muhammeda a.s., i njegovih sljedbenika iz Mekke i prelazak u Medinu 622. godine. Hidžretska godina traje oko 354 dana, a sastoji se od 12 mjeseci. Jedanaest dana je kraća nego u sunčevom kalendaru. Zbog toga se datum hidžretske nove godine razlikuje svake godine.

## POSTAVLJANJEM KAMENA TEMELJCA ZA SPOMEN OBILJEŽJE, TE NIZOM SADRŽAJA OBILJEŽENJA “BREZA 94” VELIKA POBJEDA 505. VITEŠKE BRIGADE



Postavljanjem kamena temeljca za spomen obilježje na lokaciji Sip-Križ, te nizom sadržaja obilježena je 25. godišnjica velike bužimske bitke “Breza 94”.

Obilježavanje je počelo u subotu 07.09.2019. godine odigravanjem turnira u šahu i pikadu, zatim nastavljeno u srijedu 11.09.2019. godine promocijom knjige “Radi tebe” autora Jusufa Bajrektarevića, a nastavljeno juče 12.09.2019.

godine na dan velike bitke “Breza 94”.

Delegacije su položile cvijeće i proučile fatihe na Tubretu generala Izeta Nanića i Šehida 505. viteške brigade, a zatim u velikom broju na poprištu same bitke na lokaciji Križ-Sip postavljanjem kamena temeljca za spomen obilježje, obraćanjem zvanica te historijskim časom obilježile 25. godišnjicu presudne bitke za Bužim pa i USK.

O samoj bitci su govorili neki od učesnika, Zijad Nanić, Nijaz Veladžić – Veljun i Nermin Šabić a prisutnima se obratio i Ministar za pitanja boraca u Vladi USK Ermin Zulić. Načelnik općine Bužim Mersudin Nanić čestitao je svim bivšim pripadnicima 505. Viteške brigade veliku pobjedu, te izrazio nadu da će ovo spomen obilježje biti izgrađeno i završeno do narednog obilježavanja.

U ime organizacionog odbora prisutnima se obratio Edham Eminić, koji se zahvalio Ministarstvima i općini Bužim na susretljivosti i financiranju, te je uručio zahvalnicu direktoru ŠPD “Unsko-sanske šume” Šerifu Kaljikoviću za doprinos u organizaciji obilježavanja bitnih datuma općine Bužim iz perioda 1992-1995.

Nakon službenog programa nastavljeno je druženje boraca sa narodom i omladinom koji su u velikom broju došli na ovo obilježavanje.



BUŽIM